

Tuhun vaha naçahyí Marcos saha Jesucristo

*Tá jácandúta Juan ñayivi yucú íchí
(Mt. 3:1-12; Lc. 3:1-9, 15-17; Jn. 1:19-28)*

¹ Quiahva johó naçava sáhá tuhun vaha cáhan saha Jesucristo, mé a cúú in túhún jiní já jahyi Ndióxi.

² Sañahá naçahyí profeta Isaías ña naçahan Ndióxi xihín jahyi a. Já cáchí a já: Chindahá i in da canuú çuhun nu mún, ña ná çaxi tuhun da nuú ñayivi saha yóhó ta já ndaja ndacú da íchí nuú yahún.

³ Ta çahan cóhó da tañu yucú íchí ta cachi da já xihín ñayivi:
“Caja tiahva ndó íchí nuú quixi xitoho í ta cuná ndó in íchí ndacú nu mé á ña ná ndihvi a ínimá ndo”, naçahyí Isaías.

⁴ Ta ndaja coo ín Juan yucú íchí ta naçasáhá cája ndúta dá ñayivi. Ta cáxi tuhun da xihín ná ña tá cúní na caja cáhnu ini Ndióxi sahá çachi na já ndítahan nu ná ndicó coo ini na ta já candúta ná.

⁵ Chí naquixi cuahá ndivaha ñayivi estado Judea xihín ñuu Jerusalén taa johó na nu cáhan da ta tá náhma na çachi na já naçaja ndúta dá na ini yuta Jordán.

⁶ Ta naşandixi mé Juan yóho jáhma ña naçavaha na xihín íji camello ta naşandico in ní jáhnda tóco dá. Ta naşixi da tica xihín ñuñu yucú.

⁷ Tá cáxi tuhun da nuú ñayivi já cáchí da já:

—Jatá yehe vaxi in da íin cuaha chága ndée dá a juú ga yehe chí coó sahá i ndica xítí i nu dá ña ndaxí i correa ndusa dá.

⁸ Yehe najácandúta i ndohó xihín ticuú joo mé da cán cúú da jándicutú ínima ndó xihín ínima yii Ndióxi —nacachi Juan xihín ná.

Tá nacandúta Jesús

(Mt. 3:13-17; Lc. 3:21-22)

⁹ Mé tiempo já naquee Jesús ñuu Nazaret ña ndácaan estado Galilea. Naxinu a nu íin Juan ta najácandúta Juan Jesús ini yuta Jordán cán.

¹⁰ Ta tá naquee Jesús ticuú cán já naxini a nandinuna indivi ta nanuu ínima yii Ndióxi jata mé á. Ta cáa ínima yii Ndióxi yóho tá quiahva cáa in ndijata.

¹¹ Ta naxini johu na cáhan in a indivi ta já cáchí a já:

—Yóho cúún jahyi máni i ta cájii ndivaha ini i xuhun.

Tá naxito ndojó tiñáhá sacuahá Jesús

(Mt. 4:1-11; Lc. 4:1-13)

¹² Ivi laá nasahan ínima yii Ndióxi ndáca Jesús yucú íchí nu coó ñayivi.

¹³ Ta cán nasahin a ivi jico quivi ta mé tiñáhá sacuahá naxito ndojó rí a. Ta cán ndúu quití quini joo naxinu java táto Ndióxi chindeé na mé á.

Cásáhá Jesús cáhan tuhun vaha xihín ñayivi

(Mt. 4:12-17; Lc. 4:14-15)

¹⁴ Tá nandihí nachicaan na Juan vecaa já nasahan Jesús estado Galilea caxi tuhun a nuú ñayivi tuhun vaha saha Ndióxi.

¹⁵ Já cáchí a já xihín ná:

—Sa naxinu tiempo viti ta nacayati quivi cacomí Ndióxi cuénta sahá ñayivi. Ña ndítahan nu ndo quéa jándacoo ndó cuachi cája ndó ta candúsa ndó tũhun vaha ña cuu jácacu ndohó —nacachi Jesús.

Cána Jesús comí na caca tuun xihin á

(Mt. 4:18-22; Lc.: 5:1-11)

¹⁶ In tañu xica Jesús cuahan yati yuhú tañuhú Galilea. Ta naxini a in da naní Simón xihin Andrés, da cúu ñani. Ndívi mé da yóho cúu dá da tává tiyacá ta ñuhu da jácana da ñunu dá ini tañuhú.

¹⁷ Nacasáhá cáchi Jesús já xihin dá:

—Naha quíi ndó candico ndó yehe caca tuun ndó xihin i. Táva ndó tiyacá viti joo caja i ña ná cuu tavá ndó ñayivi tañu cuachi —nacachi Jesús.

¹⁸ Ta chí ivi laá najándacoo da ñunu dá ta nandico da Jesús.

¹⁹ Anda já naxica loho ga Jesús chí nuu já naxini a Jacobo xihin ñani da Juan, da cúu jahyi Zebedeo. Ndívi da yóho ñuhu da ini barco ndája vaha da ñunu dá.

²⁰ Nacana Jesús ndívi da yóho ta chí najándacoo da tátá da, Zebedeo cán ini barco xihin java ga da cája chúun xihin dá ta já nacasáhá xica tuun da xihin Jesús.

Tá ndacaan inima quini ini in dataa

(Lc. 4:31-37)

²¹ Naxinu coo Jesús xihin na xica tuun xihin á ñuu Capernaum. Ta tá natandaa quivi ndíquehe ndée ñayivi já naquihvi Jesús ini veñuhu ta nacasáhá jánaħa na cán.

²² Ta nacatontó tóco ndihi ñayivi sahá tũhun cáħan mé á jáchi najánaħa mé á tátũhun in da ín

saha cahnda chuun ta co cáhan tátuhun na jánaha ley Moisés.

²³ Ini mé veñuhu cán nasandacaan in dataa, da ndacaan ínima quini ini. Nacasáhá cáyuhú rí cán já cáhí rí já:

²⁴ —Jesús, da ñuu Nazaret. Ndá cuénta quéa quíhvi nuún xihín nde. Á vasún jándihún sahá nde. Sa xini vaha i yohó ta cándaá cáxí ini i ña cúún in da yíi nachindahá Ndióxi —nacachi rí cán.

²⁵ Ta nacasáhá Jesús jáñani a rí quini ndacaan ini da cán. Já nacachi a já:

—Caji yúhún ta janí da yóho.

²⁶ Ta tá quéta rí quini ndacaan ini da cán nasahní yihí rí da ta cáyuhú cóhó rí já naqueta rí ini da cán.

²⁷ Nacatóntó tóco ndihi ñayivi chí nacasáhá ndaca tuhún táhan na já cáhí na já:

—Ndía quéa yóho. Ta ndá naquixi tuhun saá jánaha da yóho jáchi cáhan da xihín rí quini tátuhun in da sáhdá chuun ta chí cándúsa rí quee rí cuhún rí —nacachi na.

²⁸ Ta chí cama chá nandicuíta nuu tuhun saha Jesús níi cúú estado Galilea.

*Ta nandaja vaha Jesús ña cúú xojo Simón
(Mt. 8:14-15; Lc. 4:38-39)*

²⁹ Tá naquee na veñuhu já cuahan Jesús xihín Jacobo xihín Juan vehe Simón xihín ñani da, Andrés.

³⁰ Ta ndaja coo cándúhu ña cúú xojo Simón nuú xito nachicaan cáhni ndeé ña. Ta tá naxinu coo na cán já nacaxi tuhun na nuú Jesús ña quíhvi ña.

³¹ Anda já nacayati Jesús nu ña ta natiin a ndáha ña já nandínehe a ña chí ivi laá nandindaa cáhni á ña. Anda já nacasáhá cája ndíví ña ña cuxu na.

*Ndája vaha Jesús cuahá ñayivi
(Mt. 8:16-17; Lc. 4:40-41)*

³² Tá naqueta nuu candii ta nacuaá já ñéhe ndihi ñayivi na quíhvi xihín na ñúhu ínima quini ini nacasaá na nu Jesús.

³³ Ta tóco ndihi na ñuu nandai cuu na yuyéhe nu íin Jesús.

³⁴ Nandaja vaha Jesús cuahá ñayivi, na ndóho tá nuú cuehe. Ta natavá a cuahá ínima quini ini ñayivi. Joo cóo nasahan Jesús ñamaní nu rí quini ña ná cahan rí jáchi xini rí yo cúu Jesús.

*Xíca nuu Jesús jánaha ñayivi estado Galilea
(Lc. 4:42-44)*

³⁵ Ta naha inga quiví itaan tá cámaní yí tivi nandacoo Jesús ta naquee a ñuu cuahan nuú cóo ñayivi ña caça tahví a nu Ndióxi.

³⁶ Tá nandacoo Simón xihín java ga da xíca tuun xihin Jesús já naxini na ña cóo a íin chí naquee na cuahan na ndinducú na mé á.

³⁷ Ta tá nandiñehe ñahá na já cáchi na já xihin á:
—Tóco ndihi ñayivi ndinducú na ndohó.

³⁸ Joo cáchi Jesús já xihin ná:

—Cóho java ga ñuu yati yóho ña ná jánaha i tuhun vaha nuú na cán viti jáchi sahá ña yóho vaxi i — cáchi Jesús.

³⁹ Ta chí naxica nuu Jesús ní cúu estado Galilea cahan tuhun vaha ini veñuhu in in ñuu cán ta tává a ínima quini ndácaan ini ñayivi.

*Tá nandaja vaha Jesús in da ndóho cuehe táhyi
(Mt. 8:1-4; Lc. 5:12-16)*

⁴⁰ Ta ndaja coo ñacayati in ñataa ndóho cuehe táhyi nuú Jesús ta ñacaxítí ña nu á ja ñacasáhá cáchí ña ja:

—Cuu ndaja vaha ndó yehe tá cuni ndó —cáchí ña.

⁴¹ Ta ñatahvi ini Jesús saha dá. Anda ja ñacani ndaa ndáha á ña. Já cáchí a ja:

—Cuni ña ná ndivahún ña cán quea ñandivahún viti —ñacachi Jesús xihin dá.

⁴² Tá ñacachi a ja chí ivi laa ñandindaa cuehe táhyi ña ñandoho ña cán. Já ñandivií yiquí cuñu ña.

⁴³ Tá ñandihí ñajándindayí Jesús ña ta ñasahnda chuun nu dá ja cáchí a ja xihin dá:

⁴⁴ —Candehé. A cáhun xihin ni in túhún toho ñayivi ña ñacaja i xuhún. Cuáhán ndacún ñahun mún nuú jutú. Ta ndítahan jocún ñaha nu Ndióxi tátuhun ñasahnda ley Moisés sanahá caja ña sa ñandivaha. Já ná candaa ini tóco ndihí ñayivi ña sa ñandindaa va cuehe ñasandohún —ñacachi Jesús xihin dá.

⁴⁵ Joo tá ñaquee ña cuahan ña ñacasáhá ña ndícani ña nuú ndihí ñayivi ña ñandaja vaha Jesús ña sahá ña cán quea coo ñacuu ga ndihvi tívi Jesús ni in ñuu. Jatá ñuu nuú coo ndúu ñayivi ñasahjin a ta janda mé cán xínu coo ñayivi, ña quíxi nuú ndijáá ñuu xito nihni na mé á.

2

Tá ñandaja vaha Jesús in ña ñaxihí tuchu saha (Mt. 9:1-8; Lc. 5:17-26)

¹ Tá ñayaha chá quivi ja ñandicó coo tucu Jesús ñuu Capernaum. Ta ñacandaa ini ñayivi ña ín a vehe.

² Ta chí cama chá nanditútú cuahá ñayivi chí co vátı ga yuyéhe cándita na. Já naçasáhá cáxi tühun Jesús tühun Ndióxi nu ná.

³ Anda já naxinu coo comı taa ta ñéhe da in da naxihı tuchu saha. Nasaa da nu ín Jesús.

⁴ Joo naxini da ña a cuú xinu da yati nu ín Jesús sahá cuahá ñayivi chútú ndaa nu ín a cán. Chí nandaa da jinı véhe ta naçasáhá da súná da jinı véhe mé xoo nu ín Jesús. Ta mé cán najánuu da xıto loho nu cándúhu da quıhvi chí yávi jinı véhe cán.

⁵ Tá naxini Jesús ña cándéé ini da cán mé á já cáchı a já xihın mé da quıhvi cán:

—Candehé, jahyi a. Sa nacaja cáhnu ini ı sahá cuachún viti —nacachi Jesús.

⁶ Joo java na jánaħa ley Moisés ndúu coo cán naçasáhá cáhán na:

⁷ “Ndá cuéntá quéa ndája núu da Ndióxi xihın tühun cáħan da. Jáchı ni in túhún toho ñayivi a cuú caja cáhnu ini sahá cuachi. In túhún jinı Ndióxi quéa cuu caja cáhnu ini sahá cuachi”, nacahán na.

⁸ Joo sa nacandaa ini Jesús ña cáhvi ini na cán chí nacachi a já xihın ná:

—Ndávaħa cáhán ndo já.

⁹ Á cáhán ndó ña ihvi chága cachi ı xihın da yóho: “Nacaja cáhnu ini ı saħa cuachún viti.” Á tá coo ta cachi ı xihın dá: “Cuándacoo, ndiquehe xıtún ta caca nuún.”

¹⁰ Candehé vaħa ndó ná naħa ı nu ndo ña ín sahá ı, da nachindahá Ndióxi nduu ı ñayivi caja cáhnu ini ı sahá cuachi cája ñayivi ñuyıví yóho —nacachi Jesús xihın ná.

Anda já n̄acachi a x̄ih̄in mé da n̄ax̄ih̄i t̄uch̄u saha cán:

¹¹ —Ta viti cáhan i x̄uh̄un cuándac̄oo ndiquehe x̄ito lohún ta cuanúhu —n̄acachi a.

¹² Chí iv̄i laá n̄andac̄oo mé da quíh̄vi cán ta n̄andiquehe da x̄ito loho da já naquee da cuah̄an da nuú ndihi na ndúu cán. Anda já n̄acatóntó tóco ndihi na ta n̄acasáhá cája cáhnu na Ndióxi já cáh̄i na já:

—Ni in túh̄un tañu coó n̄ax̄ini nde in ñaha cáhnu tátuhun ña yóho —n̄acachi na.

*Tá n̄acana Jesús Leví, da cáhan na Mateo x̄ih̄in
(Mt. 9:9-13; Lc. 5:27-32)*

¹³ Tá n̄andih̄i já n̄asah̄an tucu Jesús yuhú tañuhú cán ta tá n̄acayati cuah̄á ñayivi nu á já n̄acasáhá jánah̄a nu ná.

¹⁴ Nani x̄ica Jesús cuah̄an nayaha nu ín in da naní Leví, jah̄yi Alfeo. Ta ín coo da nu sác̄oo da j̄ataca jiuh̄un cuéntá impuesto. Ta cáh̄i a já x̄ih̄in dá:

—Naha quíj̄i candicun yehe.

Anda já n̄andac̄a ndichi Leví ta n̄andico da Jesús.

¹⁵ Tá n̄andih̄i n̄asah̄an Jesús vehe Leví ta n̄asac̄oo a x̄ixi a x̄ih̄in cuah̄á da j̄ataca jiuh̄un cuéntá impuesto x̄ih̄in java ga na cája cuachi. Ta sa mé cán n̄asanduu ri java da x̄ica tuun x̄ih̄in Jesús x̄ixi da tañu na cán jách̄i cuah̄á ñayivi ndico na Jesús.

¹⁶ Joo na jánah̄a ley Moisés x̄ih̄in na fariseo tá n̄ax̄ini na ín coo Jesús x̄ixi a x̄ih̄in na cán n̄acasáhá cáh̄i na já x̄ih̄in da x̄ica tuun x̄ih̄in Jesús:

—Ndá cuéntá quéa xíxi xitoho ndó xihín na játaca jjuhún cuéntá impuesto ta xihín java ga na cája cuachi —nacachi na cán.

¹⁷ Tá naxini johó Jesús ña yóho nacasáhá cáchí a já:

—Ñayivi ín vaha co xíní ñúhú toho na da cája tátá ñahá joo na quíhvi, na cán cúú na xíní ñúhú da cája tátá ñahá. Ta yehe coo vaxi toho i cana i na sa ín vaha. Vaxi i cana i ñayivi, na cája cuachi ña ná jándacoo na cuachi cája na —nacachi Jesús.

Cáhan Jesús ndá saha quéa cajuhun na
(Mt. 9:14-17; Lc. 5:33-39)

¹⁸ In tañu tá xíjuhun na xíca xihín Juan xihín na xíca xihín na fariseo naxinu coo java ñayivi nu Jesús ta nacasáhá ndáca tuhún na mé á já cáchí na já:

—Ndávaha co xíjuhun toho na xíca tuun xihín yóhó joo xíjuhun mé nde, na xíca xihín Juan xihín na xíca xihín na fariseo —nacachi na.

¹⁹ Ta nanducú ñehe Jesús tuhun nu ná já nacachi a já:

—Á cáhán ndo xíjuhun na ndúu víco tándaha nani ín mé da tándaha cán xihín ná. Uhun. Jáchi cáji ín na nani ín mé da tándaha xihín ná. Chí a cuú toho cajuhun na.

²⁰ Joo xinu quivi candaa na mé da tándaha ta anda jáví casáhá cajuhun na. Ta cáchí i xihín ndó ña vaxi quivi candaa na yehe nuú na yóho ta anda jáví casáhá na xíca tuun xihín i cajuhun na —nacachi Jesús.

²¹ Ta nasacu Jesús inga quiahva nu ná já cáchí a já:

—Ama ná jándaha ñayivi jahmá yatá xihín in túhun jáhma saá jáchi tá nandihí ndíndí a, sáhndá chága ví a jahmá yatá cán ta jándacáhnu chága ví a yávi ña nandicahmá na cán.

²² Ta ni co táan na vino saá ini voso ní yatá jáchi jácahndi mé vino cán ní ta cuita mé vino cán ta tívi voso ní caja dó sahá ña cán quea ndítahan taán na vino saá ini voso ní saá —nacachi a.

Ña nacaja na xica tuun xihín Jesús in quivi ndíquehe ndée ñayivi

(Mt. 12:1-8; Lc. 6:1-5)

²³ In quivi ndíquehe ndée ñayivi nani xica Jesús cuahan tañu nuú naxutu na trigo xihín na xica tuun xihín á já nacasáhá túhun na yucu jini trigo.

²⁴ Tá naxini na fariseo ña cája na já nacachi na já xihín Jesús:

—Candehé. Ndávaha cája na xica tuun xuhun chuun ña co ndítahan caja na quivi ndíquehe ndée yo —nacachi na fariseo.

²⁵ Anda já nacachi Jesús já xihín ná:

—Á a ñaha cahvi ndó nuú túhun Ndióxi nu cahan sahá ña nacaja David sanahá tá nacuíco mé dá xihín na xica xihín dá.

²⁶ Ña nacaja David quea naquihvi da veñuhu Ndióxi tá nasacuu Abiatar da sacuahá nuú jutú. Já naxixi da pan yi ña in túhún jutú cúú da ndítahan nuú cuxu ña cán, nduu. Joo naxixi David ña ta nasahan da ña nuú java ga na xica xihín dá.

²⁷ Ta nacachi tucu Jesús já xihín ná:

—Candehé ndo. Coó nacavaha Ndióxi ñayivi ndoho ini na sahá quivi ndíquehe ndée ná jáchi

nasacu ini a cavaha in quivi ja ná cuu ndíquehe ndée ñayivi.

²⁸ Ña cán quéa yehe va, da nachindahá Ndióxi nduu ñayivi ín sahá i cahnda i chuun sahá quivi ndíquehe ndée ñayivi —nacachi Jesús.

3

*Tá nandaja vaha Jesús in da nahichi ndáha
(Mt. 12:9-14; Lc. 6:6-11)*

¹ Naquihvi tucu Jesús ini veñuhu ta cán nasandacaan in dataa, da nahichi ndáha.

² Ta nacasáha náni na fariseo Jesús sándehé na á ndaja vaha mé á da cán quivi ndíquehe ndée ná ja ná cuu chicaan na cuachi jatá.

³ Anda ja cáchi Jesús xihín da nahichi ndáha cán ja:

—Cuándacoo ta candichi mahñú yóho —nacachi Jesús.

⁴ Anda ja nandaca tuhún a na java cán ja cáchi a ja xihín ná:

—Ndía cáchi ley ndítahan caja í mé quivi ndíquehe ndée ñayivi. Á chindee yó ñayivi á caja í ña núu xihín ná. Á jacacú na á cahni yó na —nacachi Jesús.

Joo ni in tuhún tuhun coo nacahan na.

⁵ Nacasáha xójo ini Jesús sándehé a nu ná. Joo táhvi tucu ini a saha ná jachi cúu ná ñayivi saa ini. Ta cáchi a xihín mé dataa, da nahichi ndáha cán:

—Jandacaa ndáhun.

Tá najandacaa da ndáha dá ivi laa nandivaha ndáha dá.

6 Tá nandihí naquee na fariseo veñuhu já nacasáhá na jándique táhan na tuhun na xihín na cuéntá Herodes ña cahní na Jesús.

Tá nanditútú cuahá ñayivi yuhú tañuhú

7 Joo nasahan Jesús xihín na xíca tuun xihin á yuhú tañuhú ta cuahá ndivaha ñayivi estado Galilea nandico na nasahan na.

8 Tá nacandaá ini ñayivi ña náhnu cája Jesús, naquixi cuahá na estado Judea xihín na ñuu Jerusalén xihín na ñundáhyi Idumea xihín na inga xoo yuta Jordán xihín java na ndúu ñuu válí jíin ñuu Tiro xihín Sidón jáchi candehé na Jesús cúni na.

9 Sahá ña yóho quea naxíca Jesús ñamaní nuú na xíca tuun xihin á ña ná cacu tiahva na in barco nuú ndacaan mé á ña ná a cándíhi ñayivi cuaha cán ña.

10 Jáchi cuahá ndivaha ñayivi nandaja vaha mé á. Sahá ña cán quea tóco ndihí na quíhvi cáti na jatá ña caní ndaa ndáha ná mé á cúni na.

11 Ta tá naxini na ñuhu ínima quini ini cán Jesús ivi laá ndícava xítí na nu á ta casáhá cáyuhú cóhó na já cáchí rí quini ndacaan ini na cán já:

—Yóhó cúun da cúu in túhún jini já jahyi Ndióxi.

12 Joo jánani Jesús rí cán já sáhdá a chuun nu rí ña ná a cáxi tuhun rí yo cúu mé á.

*Tá nacaxi Jesús uxu ivi da caca tuun xihin á
(Mt. 10:1-4; Lc. 6:12-16)*

13 Tá nandihí já naquee xóo Jesús nasahan in xiqui ta tá nandihí nacana mé á java na xíca xihin á cán, mé na cúni a caxi a ta naxinu na cán nu Jesús.

14 Ta tañu na cán nandicaxi Jesús uxu ivi da caca tuun xihin á ta tá nandihí já naxindahá mé á da cahun da cahan da tuhun Ndióxi xihín ñayivi.

15 Ta naçaja mé á ña cuu ndaja vaħa da na quíhvi ta cuu caħnda da chuun nu rí quini ña ná quee rí ini ñayivi.

16 Ña yóho cúu quiví uxu ivi da nandicaxi Jesús caca tuun xihín á: Simón, da nasacu tucu a quivi cananí Pedro

17 xihín Jacobo xihín ñani da, da naní Juan, jahyi Zebedeo. Ndíví da yóho nasacu a quivi cananí Boanerges ta mé tuhun yóho cúni cachi a cúu dá táuhun jahyi in tasa ña cána indiví.

18 Naçaxi a Andrés xihín Felipe xihín Bartolomé xihín Mateo xihín Tomás xihín Jacobo, da cúu jahyi Alfeo xihín Tadeo xihín Simón, da naçica cuénta na cananista

19 xihín Judas Iscariote, mé da najicó túhún Jesús tá nu ndíhí.

Jácojo na cuachi jatá Jesús ña cája chúun a xihín ndée tiñáhá sacuaħa

(Mt. 12:22-32; Lc. 11:14-23; 12:10)

Anda já naquihvi Jesús ini in vehe xihín na xíca tuun xihín á.

20 Ta inga tucu naçhutú cuahá ñayivi nu ín a janda a cúu cuxu a xihín na xíca tuun xihín á cán.

21 Ta tá nañehé na vehe Jesús tuhun saħá ña yóho ivi laá naquixi na ña cañehe na mé á cuħun a cúni na jáchi naçatachi Jesús cáħán na.

22 Jári na jánaħa ley Moisés, na naquixi Jerusalén naçasáhá cáħan na já cáhí na já:

—Taa yóho ndácaan Beelzebú ini da, rí cúu sacuaħa nu rí quini. Ta xihín ndée mé rí cán táva da rí quini ini ñayivi —naçachi na.

23 Anda ja nacana Jesús ñayivi ja nasacu a in quiahva nu na ja cáchí a ja xihín na:

—A cuú tavá tiñáhá sacuaha mé rí.

24 Jáchí tá sáhndá java táhan na ndúu in ñuu ta cáni táhan ndaja táhan mé va na ja queá a ñéhe íní na coo nahá na.

25 Ta tá cásáhá sáhndá java táhan na ndúu in vehe ta cáni táhan na ja a cuú ga canduu nahá na mé vehe cán.

26 Ta quiahva ja tá na casáhá rí quini ndúu ndáha tiñáhá sacuaha cáni táhan rí xihín mé va rí janda quiahva sáhndá java táhan rí ja queá a cuú canduu nahá ri jáchí ndihi saha ri.

27 'Sácú u inga quiahva nu ndo. Ni in dataa a cuú ndihvi da caja cuíhná da ñaha vehe in da ndacú cán joo tá na cató da da ndacú ja cuu quehe da ñaha da cán.

28 'Mé a ndaá na cahan i xihín ndo. Ndióxi cuu caja cáhnú ini a saha tá nuú cuachi cája ñayivi xihín saha tá nuú tuhun quini cáhan na.

29 Joo tá na cahan núu na saha ínima yii Ndióxi ja queá a cája cáhnú ini Ndióxi sahá ña nacaja na ta anda ama cáa quivi candojo na cuachi sahá — nacachi Jesús.

30 Nacachi a ña yóho xihín na cán jáchí cáchí na ña ndácaan ínima quini ini a.

*Náná Jesús xihín ñani a cúní na cuni na a
(Mt. 12:46-50; Lc. 8:19-21)*

31 Tá nandihi naxinu náná Jesús xihín ñani a nu ín a joo nacandojo na jata véhe. Ta nachindahá na in na nasahan nacana ñahá.

32 Ta na ndúu coo xihín Jesús cáchí na ja xihín á:

—Jata véhe cáa íin nánún xihín ñanún ta ndínducú na yohó —cáchi na xihín Jesús.

³³ Anda já nacachi Jesús já xihín ná:

—Ná cahan i xihin ndo yo já cúu tátuhun náná i xihín ñani i.

³⁴ Anda já nasandehé a nuú na ndúu coo tivyivi xihin á cán já cáchi a já xihin ná:

—Na yoho cúu ná tátuhun náná i xihin ñani i.

³⁵ Jáchi ndá na cája ña cúní Ndióxi, na cán cúu ná tátuhun ñani i xihín quiahvá i xihin náná i —nacachi Jesús.

4

Sácu Jesús quiahva sahá in da sátá tata

(Mt. 13:1-9; Lc. 8:4-8)

¹ Nacasáhá tucu Jesús jánaḥa ñayivi yuhú tañuhú ta nataca cuahá ñayivi nu íin a cán. A juú quiahva cuahá cúu ná sahá ña cán quea naquihvi Jesús ini in barco, dó cándichi yuhú tañuhú cán. Ta nasacoo a cán ta tóco ndihi ñayivi nandaca ndita na nuú ñutí yuhú tañuhú cán.

² Já najánaḥa cuahá ñaha nuú na cán ta nasacu a quiahva nu ná já cáchi a já:

³ —Cuni johó ndó ña yoho: In da sátá tata naquee da cuahan da cata da ña.

⁴ Ta tá sátá da ña cuahan da nacuyu java ña íchi ta naxinu laa ta nasaxí rí a.

⁵ Ta java ña nacuyu a tañu yuu nuú coo cuaha ñuhú. Ta cama chá nanduta mé tata cán jáchi co cúná ñuhú nuú nacuyu a.

⁶ Joo tá naqueta candii já najáhichi a ña sahá ña coo cuaha yoho a chí nandihí sahá.

⁷ Ta java tata naçuy a tañu tohiñú ta tá naşahnu tohiñú cán já nañditáha ndihi a naçaja tohiñú chí coó naşahan mé tata cán ndá ñaha jáquee na nu á.

⁸ Ta java tata naçuy a nuú ñuhú vaha. Nañduta mé tata cán ta naşahnu a já naşahan cuahá ñaha ña jáquee na nu á. Java ña naşahan oco uxu a nuú in in tata ta java ña naşahan uni jico uxu a ta java ña in ciento a nuú in in tata.

⁹ Anda já naçachi tucu Jesús já xihin ná:

—Na íin joho, ná cuni joho na —naçachi a.

Ndicani Jesús ndá saha quéa nasacu a quiahva nu ná

(Mt. 13:10-17; Lc. 8:9-10)

¹⁰ Tá naçandoo Jesús xihin mé na uxu ivi xíca tuun xihin á cán xihin java ga na ndíco ñahá cán já naçasáhá ndáca tuhún na Jesús ña ndía cuni cachi a xihin quiahva naşacu a nuú na cán.

¹¹ Ta cáhí a já xihin ná:

—Ña coó naçandaa ini ndó jihna ña cán cándaa ini ndó a viti jáchi naşuna Ndióxi xini tuni ndo cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúu na sácú u quiahva nuu.

¹² Já quéa vati sáñdehé na joo cúu ná tátuhun na co tivi nuu ta vati xini joho na joo cúu ná tátuhun na jóho jáchi co cándaa ini na ña cáhan i xihin ná. Ta sahá ña cán quéa co ndíco coo na nu Ndióxi ta ni mé á co cája cáhu ini sahá cuachi na.

Ndicani Jesús saha da sátá tata cán

(Mt. 13:18-23; Lc. 8:11-15)

¹³ Ta já cáhí tucu a já xihin na xíca tuun xihin á:

—Ta tá cō cándaꝯ ini ndó quiahva, ña nasacu u yóho ndaja caja ndó candaꝯ ini ndó java ga quiahva ña cachi i xihín ndo.

14 Mé da sátá tata cán cúú dá tátuhun da xíca cáhan tuhun Ndióxi xihín ñayivi.

15 Java ga ñayivi cúú ná tátuhun tata ña nacuyu íchi. Táa johó na tuhun Ndióxi ta tá nandihí naxini johó na ña já vaxi tiñáhá sacuaḥa ta cája rí xihín ná ña ndíndójó na ña.

16 Ta java ñayivi cúú ná tátuhun tata ña nacuyu tañu yuu jáchi táa johó na tuhun Ndióxi ta cáji ini na ndíquehe na ña.

17 Ta tá quiahva ndiává yucu sahá ña cō ñúhu cúná yóho a quiahva já ndóho ñayivi tá casáhá ndicuíta ñayivi cája xíxi na xihín ná. Ta tá casáhá ndóho ini na sahá tuhun Ndióxi ña naxini johó na cán chí ivi laá jándacoo va na ña cándéé ini na Ndióxi.

18 Ta java na cúú ná tátuhun tata ña nacuyu tañu tohíñú jáchi táa johó na tuhun Ndióxi

19 joo ndícani ndivaha ini na sahá ñaha ñuyíví yóho. Cátóó ndivaha na ñaha cuicá chí jándahvi na mé ná xihín ña cán ta xíca ini na coo tóco ndihí ñaha nu ná. Ta cáva nuu táhan ñaha ñuyíví yóho xihín tuhun Ndióxi ini ínimá ná sahá ña cán queá cávitá ini na ta cō sáhnú na xihín tuhun Ndióxi.

20 Joo ndúu java na xini johó tuhun Ndióxi ta cándúsa na ña. Ta cája chúun vaha na xihín á ta já cuahnu na xihín á. Cúú ná tátuhun tata nacuyu nu ñuhú vaha. Java na cúú ná tátuhun tata ña nasahan oco uxu a nuú in in a. Ta java na cúú ná tátuhun ña nasahan uni jico uxu a ta java na cúú ná tátuhun ña nasahan in ciento a nuú in in tata

—nācachi Jesús xihín nā cán.

*Sácú Jesús quiahva sahá in lámpara
(Lc. 8:16-18)*

²¹ Ta cáchí tucu Jesús xihín ná:

—Coó toho chuun lámpara tá chícaan í ña tixi sato á tixi xito jáchí chuun ña quéa cánúu ña nu jíco já ná jándiyehé ña nu yo.

²² Ni in túhún toho ñaha a cuú coo jehé jáchí xinu quivi já ndáca náha nu á. Ta ni in tuhun nacañan jehé ñayivi a cuú coo jehé nahá jáchí xinu quivi já candaa ini tóco ndihi ñayivi sahá tuhun nasahin jehé cán.

²³ Na íin joho, ná cuni joho na —nācachi a.

²⁴ Ta cáchí tucu a já xihín ná:

—Candehé vaha ndó ña taa joho ndó. Tá quiahva cája ndó xihín ñayivi quiahva já caja Ndióxi xihín ndo joo chága ví caja mé á xihín ndo.

²⁵ Jáchí da sa íin ñaha nuu, ñehé táhvi dá coo chága ñaha nu dá joo da coó ñaha nuu, janda ña chá íin nu dá ndindaa —nācachi Jesús.

Jánaħa Jesús nu ná ndá quiahva sáħnu tata

²⁶ Ta cáchí tucu Jesús já:

—Tá ndiquiahva ñayivi mé ná ndáħa Ndióxi ña ná cacomí a cuénta saħa ná já cúu á tátuhun in dataa nachihin tata.

²⁷ Tá nandihí yáħa quivi ta quiji da ta ndácoo da já yáħa quivi xihín ñuú. Ta já ndúta mé tata cán ta sáħnu a joo mé da nachihin a cán co xini da ndaja sáħnu a.

²⁸ Sáħnu a jáchí chuun nu mé ñúħu quéa caja ña ná cuahnu ña cán. Jihna ñúħú ndúta mé yucu trigo

já cana yóco a ta nu mé yóco a cán ndícutú ndaa ndíqui á.

²⁹ Ta tá năchichi mé ndíqui a cán já quée na cuahăn nă jáquee na ñă jáchi năxinu coo quivi jáquee na ñă —năcachi Jesús.

*Sácú Jesús inga quiahva saha ndíqui mostaza
(Mt. 13:31-32; Lc. 13:18-19)*

³⁰ Ta cáchi tucu Jesús já:

—Viti sácú ũ inga quiahva nu ndo já ná cándaă ini ndó ndá quiahva caja Ndióxi xihín ñayivi tá casáhă a cómi a cuéntă saha ná.

³¹ Cúú á tátuhun in ndíqui mostaza ñă chíhin na nuú ñundáhyi. Cúú á ndíqui loho chága nu tóco ndihi ndíqui válí in ñuyíví.

³² Joo tá năndihi năchihin na a năsahnu a ta nănduu a in yító, dó cáhnu nu ndíhi yító. Ta xihín ndahá năhnu dó sácú do cáti ta janda laa ndíquehe ndée ri nu cáti do —năcachi Jesús.

*Sácú Jesús quiahva cuití va nuú ñayivi
(Mt. 13:34-35)*

³³ Najánaĥă Jesús tuhun Ndióxi nu ná. Ta năsacu cuahă quiahva nu ná tátuhun ñă yóho janda quiahva xinu nu mé ná cándaă ini na.

³⁴ Xihín mé quiahva cuití va najánaĥă Jesús nuú ñayivi joo tá năcandoo Jesús xihín mé nă xíca tuun xihín á já ndícani cáxi ndihi a ñăha nuú nă cán.

*Tá najăcatăji Jesús tañuhú tá ndícojo do
(Mt. 8:23-27; Lc. 8:22-25)*

³⁵ Tá năcuaá mé quivi cán já năcachi Jesús já xihín nă xíca tuun xihín á:

—Cóho inga xoo tañuhú yóho.

³⁶ Anda já najándacoo na ñayivi já naquee na cuahān na xihín Jesús ini mé barco nuú sa ndácaan mé á. Ta ndáca táhan java ga barco cuahān dó xihín ná.

³⁷ Ta ndaja coo naxinu in tachī quíni ndivaha. Ta naçasáhá ndícojo tañuhú ndíhvi dó ini barco já naçasáhá ndícutú ticuī ini mé barco cán.

³⁸ Ta chí xoo jata mé barco cán cánduhu Jesús quíjī a ta cánuu jīnī á jata ña yíhi jīnī ná. Já najándacaxí ini na mé á ta cáchī na já xihín á:

—Maestro. Chí co sáhnī a mé á ña cúni ndihi saha yo jáchī sácoo barco cahá ticuī cuahān do —naçachi na.

³⁹ Anda já nandacoo Jesús ta naçasáhá jánañi a tachī xihín tañuhú viti já cáchī a já:

—Catáji ndo.

Já najáyaa tachī. Já naçandoo táji níi mé cán.

⁴⁰ Anda já naçachi Jesús xihín na xíca tuun xihín á:

—Ndávaha nañihví nahá ndo. Ndávaha co cándeé ini ndó yehe —naçachi a.

⁴¹ A juú quiāhva nañihví mé na cán já naçasáhá cāhān xihín táhan na:

—Ndá da cúu dataa yóho ña jānda tachī xihín tañuhú cándúsa nu cāhān da —naçachi na cán.

5

Tá nandaja vaha Jesús in da ndácaan ínima quini ini

(Mt. 8:28-34; Lc. 8:26-39)

¹ Anda já naxinu na inga xoo mé tañuhú cán nu íin ñundáhyi cuéntá Gadara.

² Ta tá nanuu Jesús barco cán já naquee in dataa camasanto já naxinu da nuú Jesús. Mé da yóho cúú dá da ndácaan ínimá quini ini.

³ Ta íin va da nu ndúxu ndii ta ni in na a cuú cató na da ni xihin cadena a cuú cató na da.

⁴ Vatí cuahá tañu sá naçató na saha dá xihin ndáhá dá joo sáhndá da cadena ta jácuachi da ña ta ni in na a cuú caja xihin dá.

⁵ Nuú ta ndiví xíca nuu da yúcu xihín nu ndúxu ndii cáyuhú da xíca nuu da ta jándicuehe da mé dá xihín yuu.

⁶ Joo tá naxini xíca da Jesús, nihi chá naşahan da naxinu da nu íin a já nandicava xítí da nu á.

⁷ Ta cáyuhú cóhó da já cáchí da já xihin á:

—Ndá cuéntá quéa vasún quihvi nuún xihín i. Yóho cúún Jesús, da cúú in túhún jiní já jahyi Ndióxi, ña cáhnu ndivaha. Xíca tahví i nuun ña ná a jándohún ini i —naçachi da.

⁸ Naçachi da ña yóho xihin Jesús jáchi naçasáhá sáhndá mé á chuun nu rí quini cán já cáchí a já:

—Ínimá quini, janí da yóho.

⁹ Anda já nandaça tuhún Jesús mé rí quini cán já cáchí a já:

—Ndaja nanún.

Anda já nanducú ñehe da cán tuhun nu á já naçachi da já xihin á:

—Legión naní nde jáchi cuaha cúú nde.

¹⁰ Ndáhví mé xíca tahví da cán nu Jesús ña ná a tává xíca a rí quini cuhun ri.

¹¹ Ta ndaja coo xíca nuu cuaha cóchí xixáhan rí yati yúcu cán.

12 Sahá ña cán quea naxica tahví mé ínima quini cán nu Jesús já cáhí rí já:

—Chindahá ndehe ná cuhun nde ndihvi nde cóhí cáa.

13 Anda já nasahan Jesús ñamani ta chí naquee ínima quini nasañuhu ini da cán já nandihvi rí ini cóhí xica nuu cán. Ta tóco ndihi cóhí yóho xínu rí cuahan rí nanuu rí nu ndáyi já najáqueta nuu rí mé rí ini tañuhú chí nacandaa rí ticuñi já naxihí rí. Tátuhun ivi mil cóhí nandihí saha.

14 Ta ndaja coo mé da ndáa cóhí cán nayihví da chí xínu da cuahan da caxi tuhun da ña nayaha yóho nuú ñayivi ñuu Gadara xihín nuú java ga na ndúu yati cán. Naquee cuahá ñayivi mé cán candehé na ña nacuu.

15 Tá naxinu coo na nu lín Jesús naxini na lín coo da nasañuhu cuaha rí quini ini cán. Sa nandaca ndixi da jáhma ta sa nandicaxí táhyí ini da. Chí nayihví na.

16 Ta na naxini ña nacaja Jesús cán nacasáhá na ndícani na nuú ñayivi ña nandoho dataa, da nasañuhu rí quini ini cán xihín ña nandoho cóhí viti.

17 Anda já nacasáhá na xica tahví na nu Jesús ña ná quee a cuhun a.

18 Tá sa cuahan ndihvi Jesús ini mé barco cán já naxinu da nasañuhu rí quini ini cán já nacasáhá da xica tahví da nu á ña ná quiahva ñamani nu dá cuhun da xihin á.

19 Joo coo nasahan Jesús ñamani nu dá já nacachi a xihin dá:

—Cuanúhu vehún ta ndicani nuú na vehún ndaja náhnu ñaha ñacaja Ndióxi xuhun ta ndaja natahvi ini a sahun —ñacachi a.

²⁰ Já ñaquee da cuahan da ta ñacasáhá da ndicani da nuú ñayivi ndúu java ñuu cuéntá Decápolis tóco ndihi ña ñacaja Jesús xihin dá. Chí cátóntó na táa johó na ña.

Tá nandaja vaha Jesús jahyi jhí Jairo xihín in ñá ñacani ndaa ndáha jáhma á

(Mt. 9:18-26; Lc. 8:40-56)

²¹ Tá nandihí nandihvi Jesús ini mé barco cán já ñaxinu coo a inga xoo tañuhú nuú ñaquixi a. Ta cán nanditútú cuahá ñayivi nu á mé yuhú tañuhú cán.

²² Já ñaxinu in da naní Jairo, da sáhdá chuun veñuhu. Tá ñaxini da Jesús ñacaxítí da sahá.

²³ Ta ndáhví mé ñaxica tahví da nu á já cáchí da já:

—Xíhi jahyí i viti ñuhú. Caja ndó ñamani ná coho vehe chinúu ndó ndáha ndó jatá ña ná ndivaha ñá já ná catacu ñá —ñacachi da.

²⁴ Anda já ñaquee Jesús cuahan xihin dá. Chí cándíhi táhan mé ñayivi ndíco na jatá cuahan na.

²⁵ Ta tañu ñayivi cán ndácaan in ñá quíhvi. Sa ñaxinu uxu ivi cuia ndítahví ñii ña.

²⁶ Nandoho ndivaha ini ñá nuú na cája tátá ñayivi ta sa najátiví ndihi ñá jiuhún ña cá tátá ña cúni ña. Joo a cuú ndivaha ña ta janda cája ndeé chága ví a xihin ña.

²⁷ Tá ñaxini johó ñá saha Jesús já cuahan ñá cayati ñá chí jatá tañu tóco ndihi ñayivi cuahan jatá mé a cán. Ta ñacani ndaa ndáha ñá jáhma á

28 jáchi ñacahán ña: “Tá ná cani ndaa cuití ndahá yo jáhma á já ndavaḥa í”, ñacahán ña.

29 Ivi laá nahichi ñi ñá. Naxini cáxi ña nandivaḥa ñá ta cuahan va cuehe nandoḥo ñá.

30 Jári Jesús ivi laá ñacandaa ini a ña nandivaḥa in ñayivi ñacaja ndée mé á. Já ñacasáhá sándeḥé a chí jata tañu ñayivi. Já ñacasáhá ndáca tuḥún á ña já cáchi a já:

—Ndá ndó ñacani ndaa ndáha jahmá i.

31 Ta nanducú ñeḥe mé ña xíca tuun xihín á cán tuḥun nu á já cáchi ña já xihín á:

—Sándeḥé vaḥa mé ndó ndá quiahva cándíhi táhan ñayivi vaxi na xihín ndo ta cáa ga mé ndó ndáca tuḥún ndó ndá ña ñacani ndaa ndáha jáhma ndo —ñacachi na.

32 Joo cáva nuu nuu Jesús sándeḥé a ndá ña ñacani ndaa ndáha jáhma á.

33 Ta mé ña nandivaḥa cán tá ñacandaa ini ñá ña ñayaha já ñacasáhá quíji ñinu ñá sahá ña yíhvi ña. Já ñaxinu ñá ñasaxítí ña nu Jesús. Anda já ñacasáhá ña ndícani ñá nu á ndaja cáa ña ñacaja ñá.

34 Anda já ñacachi Jesús já xihín ña:

—Jahyi a, nandivaḥún jáchi ñacandúsún yeḥe. Cuanúhu ta a ndícani ga inún jáchi nandindaa cueḥun —ñacachi Jesús.

35 Cáhan yji va Jesús xihín ñá cán tá ñaxinu java na ñaquixi veḥe mé da sáhndá chuun veñuhu cán já ñacachi na já xihín dá:

—Sa ñaxihí va jahyi ndó. A jáquihvi ga ndó da xíca jánaḥa ñayivi jan —ñacachi na.

36 Joo naçaja Jesús tátuhun ço xini joho a nuú naçahan na. Naçasáhá cáchí a já xihin da sáhdá chuun veñuhu cán:

—A cáyihví tohún. Candúsa cuití vún yehe —cáchí a.

37 Ta çoó naçahan Jesús ñamani nuú na cuaha ndúu cán çuhun na xihin á. Na naçahan cuití xihin á cúu Pedro xihin Jacobo xihin Juan, da cúu ñani Jacobo.

38 Tá naçinu na vehe mé da sáhdá chuun veñuhu cán já naçini a ndíváá ñayivi sácu ndivaha na cáyuhú na ndúu na cán.

39 Já naçuihvi a vehe ta já cáchí a já:

—Ndávaaha ndíváá nahá ndo ta sácu cuaha ndo. Ta çoó naçihí toho ñáloho yóho joo quíji cuití va ñá —naçachi a xihin na cán.

40 Joo naçasáhá na sácu ndaa na a. Anda já natavá Jesús tóco ndihi ñayivi jata véhe. Na naçuihvi xihin á naçacuu tátá náná ña xihin na xíca tuun xihin á. Ta naçayati a nu cándúhu mé ñáloho cán.

41 Já naçiin a ndáha ña ta naçasáhá cáchí a já xihin ña:

—Talita, cumi —naçachi a. Mé tuhun yóho cuni cachi a: Ñáloho cáhan i xuhun cuándacoo.

42 Ivi laá nandacoo ñáloho, ñá ndacaan uxu ivi cuia ta naçasáhá ña xíca nuu ñá. Já naçatontó tóco ndihi ñayivi.

43 Joo naçahnda Jesús chuun nuú na ndúu cán ña ná a cáxi tuhun na ña nayaha yóho nuú java ga ñayivi. Ta naçahnda a chuun nu ná ña ná quiahva na ña cuxu mé ñáloho cán.

6

Ín Jesús ñuu a Nazaret

(Mt. 13:53-58; Lc. 4:16-30)

¹ Naq̄uee Jesús cuanúhu á ñuu a. Já naq̄uee na xíca tuun xih̄in á cuah̄an na xih̄in á.

² Tá nax̄inū quiv̄i ndíquehe ndéé ná já naçasáhá Jesús jánaḥa ñayivi ini veñuhu cán. Ta cuah̄á ñayivi nax̄ini joh̄o nuú naçah̄an ta chí naçatóntó na ta ndáca tuh̄ún xih̄in táhan na já cáchí na já:

—Ndájá naçatiah̄va nah̄á da yóho ña jánaḥa dá nu yō. Ndá naquixi ña ndíchí jin̄i dá. Ndá naquixi ñaha xitúhún cája da.

³ Á a juú da yóho cúu da cája chúun xih̄in yíto, da cúu jah̄yi María. Ta ñani da cúu Jacobo xih̄in José xih̄in Judas xih̄in Simón. Ta quiah̄va da jan ndúu ñuu yóho xih̄in mí —cáchí na ndáca tuh̄ún táhan na.

Ta chí coó nax̄een na candúsa ñahá na.

⁴ Sah̄á ña cán queá naçachi Jesús já xih̄in ná:

—Vatí tóco ndiḥi ñayivi cája cáhnu na in profeta joo na vehe da xih̄in na ñuu da co candúsa na da —naçachi Jesús.

⁵ Chí coó naçuu caja Jesús ña náhnu nuú na cán. Java va na quíhv̄i cuití va naçhinúu a ndahá jin̄i ná já nandaja vaha a na.

⁶ Ta chí naçatóntó Jesús saḥá ña co candúsa na mé á. Saḥá ña cán queá naq̄uee Jesús cuah̄an jánaḥa ñayivi java ga ñuu válí ndúu yati cán.

Tá naçindahá Jesús ux̄u iv̄i na xíca tuun xih̄in á caxi tuh̄un na nuú ñayivi saḥa mé á

(Mt. 10:5-15; Lc. 9:1-6)

⁷ Tá najánditaca Jesús ndíhux̄u iv̄i na xíca tuun xih̄in á cán já naçindahá a na tá iv̄i tá iv̄i cañehe

táhan na cuhun na. Ta nasahan ndée nu ná ña ná cuu tavá na ínimá quini ñúhu ini ñayivi.

⁸ Ta nasahnda a chuun nu ná ña ná a cañehe toho na ñaha cuhun na íchi. In túhún ña cuu cañehe na cuhun na cúu in garrote, dó tiin ndaa na. Joo a cuú cañehe na ni yátí ni pan ni jiuhún.

⁹ Ndítahan cayihi na ndusa ta in túhún cotó na ndítahan candixi na cuhun na.

¹⁰ Ta nacachi a já xihin ná:

—Tá ná xinu coo ndó in vehe, canduu ndó mé vehe jan anda quiahva xinu quívi quee ndó cuhun ndo.

¹¹ Ta ndá ñuu co cúni na ndiquehe vaha na ndohó ta ni co cúni na taa joho na nu cáhan ndo já quéa cuahán queta ndó cuhun ndo ta catí ndó ña yáca saha ndo já ná naha ña cuahan cuachi na cán jata mé va na. Mé a ndaa ná cahan i xihin ndo ña tá ná xinu quívi caja vii Ndióxi sahá ñayivi ndúu ñuyíví já quéa jándoho chága Ndióxi ini ñayivi ñuu jan sahá ña coo nandiquehe na ndohó a juú ga tá quiahva najándoho a ini na ñuu Sodoma xihin Gomorra sanahá —nacachi Jesús xihin ná.

¹² Anda já naquee mé na xíca tuun xihin á cuahan na caxi tuhun na nuú ñayivi ña ndítahan nu ná ndicó coo ini na jándacoo na cuachi cája na.

¹³ Ta natavá cuaha ná ínimá quini nasañuhu ini ñayivi ta tá naxojo na sítí jini ñayivi quívi já nandivaha na.

*Tá naxihí Juan, da nacaja ndúta ñayivi
(Mt. 14:1-12; Lc. 9:7-9)*

¹⁴ Nañehe Herodes, mé da cómí cuéntá sahá ñayivi cán tuhun sahá Jesús jáchi ní cúu

nandicujita nuu tuhun sahá. Ta já cáchí Herodes já saha Jesús:

—Á a juú Jesús cúú á Juan, da najácandúta ñayivi ta viti nanditacu tucu da. Sahá ña cán quéa ín ndée da cája da tóco ndihi ña cája da yóho —cáchí da.

¹⁵ Ta java na cáchí na já:

—Á a juú da yóho cúú Elías, da nasacuu profeta.

Ta java na cáchí na já:

—Á a juú da yóho cúú in profeta tátuhun na profeta nasanduu sanahá ndivaha.

¹⁶ Tá naxini johó Herodes ña yóho já nacasáhá cáchí da já:

—Jivi ndusa da yóho cúú Juan, da najácandúta ñayivi, da nasahnda i chuun ná chitúhun ná jico dá joo viti nanditacu tucu da —nacachi da.

¹⁷ Jáchi mé Herodes yóho sa nasahnda da chuun ña ná tiin na Juan, da najácandúta ñayivi ta nacató na da já nachicaan na da vecaa. Nacaja da ña yóho sahá Herodías, ña nasacuu ñájíhí Felipe, ñani mé Herodes jáchi sa naquehe Herodes ña cacuu ña ñájíhí mé dá.

¹⁸ Ta natiin Herodes mé Juan jáchi já nasacahan Juan já xihin dá:

—Co ndítahan coún xihin ñájíhí ñanún —nacachi da.

¹⁹ Sahá ña cán quéa naxojo ini Herodías xihin Juan. Ta cúni ña cahní ña da joo a cuú caja ña.

²⁰ Jáchi yíhví Herodes Juan sahá ña xini da ña cúú Juan in ta ndaa, da co cája cuachi. Ña cán quéa coó nasahan Herodes ñamaní nu mé Herodías caja ña ña núu xihin dá. Ta táa johó Herodes nu cahan

Juan vatí cáhvi ivi joho ini da sahá ña xíni joho da joo cáji ini da táa joho da nu cáhan da.

²¹ Joo in quivi nanuna nu Herodías cahní ña Juan jáchi nacaja Herodes in víco cuénta quivi nacacu da. Mé já nacana da da náhnu ndúu nu dá ña ná quixi na cuxu na xihin dá. Ta nacana da tóco ndihi na cúu sacuaha nuú soldado xihin tóco ndihi ñayivi ín saha estado Galilea.

²² Ta ndaja coo ñá cúu jahyi jíhí Herodías naquihvi ñá nu ndúu na xíxi na ta nacasáhá ña xíta sáhá ña nuú ndihi na cán. Ta nacatóo Herodes xihín na ndúu xíxi xihin dá ndá quiahva naxita sáhá ña sahá ña cán quea nacachi Herodes xihin ña:

—Ndía cúni mún, cacún ña nuú i jáchi quiahva i ña nuun —nacachi da.

²³ Ta nasahan da tuhun da nu ñá cán ña quiahva da tóco ndihi ñaha ná caca ñá nu dá vatí ñahñu táhvi ndaa ñundáhyi ña cómi da chuun saha nacachi da quiahva da nu ña.

²⁴ Já naquee ñá cán cuahan ñá caxi tuhún ña nu náná ña ña nacachi Herodes xihin ñá. Ta nandaca tuhún ñá náná ña ndía caca ñá nu dá ta já nacachi mé náná ña já xihin ña:

—Caca yiquí jíni Juan, da jacandúta ñayivi —nacachi Herodías.

²⁵ Ta cama chá naquihvi tucu ñá cán nu ndácaan Herodes já cachí ña já xihin dá:

—Viti ñúhú cúni ña ná quiahva mé ndó yiquí jíni Juan, da jacandúta ñayivi nuú i ini in coho cáhnu —nacachi ñá.

²⁶ Ta ndaja coo nacasáhá nacacuéha ndiva ha ini Herodes sahá ña naxica ñá cán yiquí jíni Juan.

Joo sahá ña sa nasahan da tuhun da nu ña ta sa naxini joho tóco ndihi na ndúu xíxi xihin dá cán ña nacachi da xihin ña sahá ña cán quéa ndúsa caja da ña cúni ña.

²⁷ Chí ivi laá nachindahá da in soldado vecaa ña ná cañehe da yiquí jíní Juan quixi a.

²⁸ Naxinu soldado cán vecaa já nachitúhun dá jico Juan já ñehe da ña ini in cohó cáhnu já nandiquiahva da ña nu ña cán já nandiquiahva ña a nu náná ña.

²⁹ Tá nacandaa ini na naxica xihin Juan ña nacaja na xihin dá já nasahan na nandiquehe na yiquí cuñu da já najánduxu na da.

*Tá nasahan Jesús ña cuxu uhun mil tau
(Mt. 14:13-21; Lc. 9:10-17; Jn. 6:1-14)*

³⁰ Tá nandihí já nandique táhan tucu na xíca tuun xihin Jesús xihin á já nacasáhá ndícani na nu á ña nacaja na xihín ña najánaha na.

³¹ Já nacachi Jesús xihin ná:

—Naha ndó ná cohó ndiquehe ndée loho í nu cáa xóo.

Nacachi a já xihin ná jáchi cuahan vaxi ñayivi xíca nuu cuaha chá na mé cán ta chí co sahan na ñamaní cuxu na.

³² Anda já nandihvi Jesús xihín na xíca tuun xihin á ini in barco já naquee na cuahan na in nu cáa xóo.

³³ Joo cuahá ñayivi nandicuni na Jesús tá naquee a cuahan. Já xínu cuahá ñayivi tá nuú ñuu cán cuahan sahá na xoo nuú cuahan Jesús ini barco. Ta jihna ga mé ná naxinu yuhú tañuhú cán a juú ga Jesús.

³⁴ Tá nanuu Jesús barco cán já naxini a cuahá ndivaha ñayivi. Já natakhi ini a saha ná jáchi tá quiahva ndúu ndicachi, rí coó xitoho quiahva já ndúu na. Anda já nacasáhá jánaha cuahá ñaha nu ná.

³⁵ Ta tá sa cáhini cuahan naxinu na xica tuun xihin á já cáchi na já:

—Sa nahini va ta a juú xoo nu ndúu ñayivi quéa yóho.

³⁶ Ndindayí ndó ñayivi ná cuhun na ñuu válí xihin nuú yati yóho já ná cueen na ña cuxu na —nacachi na xica tuun xihin Jesús.

³⁷ Tá nandihí já nanducú ñehe Jesús tuhun já cáchi a já:

—Mé ndó quiahva ndó ná cuxu na —nacachi Jesús xihin na cán.

Ta nacachi na já xihin á:

—Ndá cuu caja nde quiahva nde ña cuxu na yóho jáchi jiuhún cuahá ndivaha xini ñuhú nde já cuu cueen nde pan cuxu ñayivi cuaha yóho. Ta ni a quéta toho ivi ciento denario —nacachi na.

³⁸ Já nacachi tucu Jesús já xihin na cán:

—Ndaja pan cómi ndo. Cuahán ndo candehé ndo.

Tá nasahan na sándehe na já cáchi na já xihin á:

—Íin uhun pan xihin ivi tiyacá.

³⁹ Anda já nasahnda Jesús chuun nu ná ña ná jácaco na ndihí ñayivi tá táhnda nuú yucu cuí cán.

⁴⁰ Ta nasaco na java táhnda in ciento na ta java táhnda ivi jico uxu na.

⁴¹ Anda já natiin Jesús ndihuhun pan xihin ndiví tiyacá ta sándehe a indiví já nandiquiahva ndixahvi nu Ndióxi. Ta nasahnda java pan já

naṣahaṅ ña nuú na xíca tuun xihín á já ná ndicahnda na ña nuú ñayivi. Tá quiaḥva já naṣahnda tiyacá já nanditahnda rí nu tóco ndihi ñayivi cán.

⁴² Já naḥixi tóco ndihi ñayivi cán ta naḥutú tixi ndihi na.

⁴³ Ta mé pan xihín tiyacá ña naḥandoo naḥixi na najáḥutú na uxu ivi toyicá.

⁴⁴ Ta naḥixi uhun mil dataa cán.

*Tá naḥica sáhá Jesús nuú tañuhú
(Mt. 14:22-27; Jn. 6:16-21)*

⁴⁵ Tá nandihí naḥaja Jesús ña ná ndihvi na xíca tuun xihín á ini in barco ña ná cuhun cuéé na inga xoo tañuhú já xinu na Betsaida nani ndíndayí a ñayivi já saa mé á cán ndique táhan xihín ná.

⁴⁶ Ta tá sa nandíndayí ndihi a ñayivi naḥquee a cuahan yucu caḥa tahví a nu Ndióxi.

⁴⁷ Tá naḥuaá sa ndácaan barco maññú tañuhú cán ta Jesús ín yíi va nu ñúhu.

⁴⁸ Ta naḥini a ña ndóho ini na xíca tuun xihín á jáchi a cuú jácaca na barco ini ticuúí jáchi mé xoo nuú cuhun na vaxi tachí. Tá sa cuahan tívi já xíca sáhá Jesús cuahan nuú ticuúí xoo nu ndúu na ta tá naḥayati a nu ndúu na jalóho yaha saa cuhun a, nduu.

⁴⁹ Joo tá naḥini na xíca sáhá Jesús nuú ticuúí naḥahán na cuú á in ínima já naḥayuhú cóhó na.

⁵⁰ Jáchi tóco ndihi na naḥini ñahá naḥihví na. Joo nandicaḥan Jesús já cáchi a já:

—Ndacú coo ini ndó jáchi yeḥe va cuú u. A yíhví toho ndó —naḥachi Jesús.

⁵¹ Tá nandaa Jesús jaḥa barco nu cándójó na já najáyaa tachí. Chí naḥatontó mé na xíca tuun xihín á cán.

⁵² Jáchi a ñáha tacu vaha ini na sahá ña ñacaja Jesús tá nandaja cuaha mé á pan xihín tiyacá jáchi nandaji tuun xíní túni ná.

Tá nandaja vaha Jesús na quíhvi ndúu ñundáhyi Genesaret (Mt. 14:34-36)

⁵³ Naxinu na inga xoo tañuhú ta ñacató ndaa na barco yuhú tañuhú cán já ñasaa na ñundáhyi Genesaret.

⁵⁴ Tá quéta Jesús xihín na xíca tuun xihín á ini barco cán ivi laá nandicuni ñayivi mé á.

⁵⁵ Já xínu na cuahan na ndijáá ñuu válí ndúu yati cán ndúcú na ña quíhvi já ñéhe na ña nuú xito cása na nu Jesús.

⁵⁶ Ta ndá ñuu ñacuu nu quíhvi Jesús cúú á ñuu náhnu á ñuu válí á yúcu já quéta ñayivi sácú na ña quíhvi yuhú íchi. Ta já xíca tahví na nu Jesús ña ná quiahva ñamaní cani ndaa ndáha ná a vatí loho yuhú jahmá a. Ta ndá na ñacani ndaa ndáha mé á ivi laá nandivaha na.

7

Ña cája quini ínimá ñayivi (Mt. 15:1-20)

¹ In tañu na fariseo xihín java na jánaħa ley Moisés, na ñaquixi ñuu Jerusalén ñacayati na nu ín Jesús.

² Ta ñaxojo ini na tá ñaxini na ña ndúu coo java na xíca tuun xihín Jesús xíxi na tá cámaní ndahá na tá quiahva ín costumbre na Israel.

³ Jáchi jánaħa na fariseo xihín ndihi na Israel ña a cuú cuxu na tá cámaní ndahá vaha na tá quiahva ín costumbre tásáhnu jícó na.

4 Ta jári jánaḥa na ña tá ndícó cōo na sáhan na yahvi xíní ñúhú ndahá na tá quiahva ín costum-bre na já ná cuu cuxu na. Ta ín cuaḥá ga nuú ñaha jánaḥa na ndítahan caja na tátuhun ña ndícata na yáxi xíhi na xihín tindoḥo xihín cohó caa anda xito quíji na viti, ndítahan ndicata na.

5 Anda já naçasáhá na fariseo xihín na jánaḥa ley Moisés cáchi na já xihín Jesús.

—Ndávaha cō cája na xíca tuun xuhun tá quiahva naçachi tásáhnú jíco yo caja í. Ndávaha xíxi na tá cámaní ndahá na tá quiahva sáhndá ley caja í — naçachi na.

6 Já naçachi Jesús já xihín ná:

—Mé a ndaa naçahan profeta Isaías saha ndo jáchi cō cúú ndó tá quiahva ndáa ndó.

Já naçahyí da já:

Yuhú ñinu uun na cája cáhnú na yehe.

Ta cō cája cáhnú na yehe xihín ndinuhu ínima ná.

7 Mé a uun va quéa cája cáhnú na yehe, jáchi ña jánaḥa na nuú ñayivi cúú á ña quixi jini mé cuití va na, naçahyí Isaías sanahá.

8 Jáchi najándacoo ndó ña naçahnda Ndióxi nu ndó caja ndó ta naçasáhá ndícō cáhnú ndó costumbre ña naçaja tásáhnú jíco ndo. Ta sahá ña yóho ndícata ndó tindoḥo xihín yáxi xíhi ndó ta cája ndó cuaḥá chága costumbre yatá —naçachi Jesús xihín ná.

9 Já naçachi tucu a já xihín ná:

—Sahá ña cúni ndo candico cáhnú ndó costum-bre mé va ndó sahá ña cán quéa najándacoo ndó ña naçahnda Ndióxi caja ndó.

10 Jáchi já cáchi ley Moisés: “Caja cáhnún tátún xihín nánún”, ta jári cáchi a já: “Ndá na ná chicaan

cháhan jata tátá na á jata náná na, ndítahan quivi na”, cáchí ley Moisés.

11 Joo ndóhó jánaḥa ndó nuú ñayivi ña cuu caḥan na já xihin tátá na á náná na: “A cuú chindeé e ndóhó jáchi sa ḥasacu xoo i ñaha i quiahva i ña nu Ndióxi”, cáchí na.

12 Tá ná cachi na ña yóho já queá co ndúsa ga chindeé na tátá na á náná na.

13 Quiahva joho cája ndó sácu xóo ndó ña ḥasahnda Ndióxi nu ndo ta ndája ndó a tátuhun in ñaha ña coó saḥa. Jáchi ndíco cáhnu ndó costumbre ña najándadacoo tásáhnu jícó ndó nu ndo ta quiahva já jánaḥa ndó nuú jahyi ndó. Ta cuahá ga ñaha tátuhun ña yóho cája ndó —ḥacachi Jesús.

14 Anda já ḥacana tucu Jesús ñayivi já ḥacachi a já xihin ná:

—Cuni joho ndihi ndó nu cáhan i xihin ndo ta candaḥa ini ndó ña.

15 Ni in ñaha xíxi ñayivi a cuú caja quini ínima ná. Ña cuu ndaja quini ñayivi cúú ña quixi ínima na tátuhun ña cáhan na xihín ña cája na.

16 Na ín joho, ná cuni joho na —cáchi Jesús.

17 Tá nandihí nandihvi Jesús ini in vehe ta ḥacandoo cuahá ñayivi jata véhe. Já nandaca tuhún na xíca tuun xihín á ña ndía cuni cachi a xihín tuhun ḥacahan xihín ná.

18 Ta nanducú ñehe a tuhun nu ná já ḥacachi a já:

—Á coó toho xíní túni ri ndóhó va, vaḥa. Jáchi co cándaḥa ini ndó ña tóco ndihi ñaha xíxi ñayivi a cuú caja quini a na.

19 Jáchí ña xíxi ñayivi co xínu a ini ínima ná joo xínu coo a tixi na já queta tucu a yiquí cuñu na — ñacachi Jesús.

Xihín tuhun yóho ñacachi Jesús xihín ná ña cuu cuxu na tóco ndihi ñaha ña xíxi ñayivi jáchi co ndája quini a ínima ná.

20 Ta ñacachi tucu Jesús já:

—Ña cuu ndaja quini ñayivi cúu ña quíxi ínima ná tátuhun tuhun cáhan na xihín ña cája na.

21 Jáchí chí ini ínima ná quéta ña cáhvi núu ini na tátuhun ña cáhvi ini in dataa coo da xihín ñájíhí ñani táhan da á tá xíca ini da coo da xihín in ñáñáha, ñá co cúu ñájíhí da á tá cáhvi ini na cahní na ndíi.

22 Ta sa mé cán quéta ña xíca ini na caha cuíhná na ta jári xíca ini na coo cuahá ndivaha ñaha nu ná. Ta sa mé cán quéta ña núu cája na ta cáhan na ña tuhún ta cája na tá nuú cuachi ta cáhíhvi ini na ta cátóo na cahan na saha táhan na ta cája cáhnu na mé ná ta quíhvi cája na.

23 Tóco ndihi ña núu yóho ña cáhvi ini ñayivi caha na, quíxi a ínima ná ta ndája quini a na.

Tá ñacandee ini in ñá tóho Jesús

(Mt. 15:21-28)

24 Já ñaquee Jesús cuahan chí ñundáhyi cuéntá Tiro xihín Sidón. Ta ñaquíhvi a in vehe coo a ta co cúní a ña ná candaa ini na ñuu ña iin a cán joo coo ñacuu coo jehé a.

25 Chá va ta ñacandaa ini in ñáñáha ña íin Jesús vehe cán. Ta íin in jahyi jíhí ña, ñá ndácaan ínima quini ini. Ta ndaja coo nasaa ñá ta ñacaxítí ña saha Jesús.

26 Ta cúu ñá ñá tóho cuéntá ñundáhyi Sirofenicia. Ta naxica tahví ñá nu Jesús ña ná tavá a ínima quini ndácaan ini jahyi ñá.

27 Anda já nacachi Jesús já xihin ña:

—Jihna ñúhú ndítahan nuú i chindeé e na Israel anda jáví cuu chindeé e ndohó, na tóho jáchi íin in tuhun ta cáchí a ña a váha toho candaa í pan xíxi na valí ta jácana í ña nuú tina —nacachi Jesús.

28 Anda já nacachi mé ñá tóho cán já xihin Jesús:

—Mé a ndaa cáhan ndó, xitoho. Joo anda tina, rí ndúu tixi mesa xíxi rí ña jácuyu jahyi xitoho rí —nacachi ñá.

29 Anda já nacachi Jesús já xihin ñá:

—Vaha va nacahun. Sahá ña cán quéa cáchí i xuhun cuanúhu viti jáchi sa naqueta va ínima quini nasandacaan ini jahyún —nacachi Jesús.

30 Ta tá naxinu ñá vehe já naxini ñá cándúhu jahyi ñá nuú xito ta sa coó ga ínima quini cán ndácaan ini jahyi ñá.

Tá nandaja vaha Jesús in da jóho, da a cuú cahan

31 Naquee Jesús ñundáhyi cuéntá Tiro ta nayaha chí ñuu Sidón xihin java ga ñuu cuéntá Decápolis cán já naxinu coo a tañuhú Galilea.

32 Cán ñéhe na in dataa nacasaá na nu Jesús. Cúu dá da jóho ta cúu dá da níhi. Ta naxica na nu á ña ná chinúu a ndáha á jiní dá já ná ndivaha da.

33 Já natavá xoo Jesús da tañu ñayivi cán. Já najáquihvi a in nducu ndáha johu da ta naxihnu a tójí a já nacani ndaa a tójí a yáa dá.

34 Tá nandihi nasandehé a indiví já ndísaa ndísaa ínima á já nacachi a já xihin dá:

—Efata —ñacachi a ta ña yóho cúnj cachi: Ná ndinuna.

³⁵ Ivi laá nandinuna johó mé da johó cán ta nandivaha yáa dá já ñacasáhá cáhan vaha da.

³⁶ Ta ñasahnda Jesús chuun nuú ndihi na ña ná a cáxi tuhun na ña yóho nuú ni in ñayivi. Joo tá ñacachi a ña yóho já quéa ví ga ví cáhan na.

³⁷ Chí cántóntó ndihi ñayivi tá xini johó na ña ta cáhan xihin táhan na já cáchí na já:

—Vaha ndivaha cája Jesús tóco ndihi ñaha jáchi jánditacu a na johó ta jándicahan mé á na níhi —ñacachi na.

8

Tá nasahan Jesús ña cuxu comi mil ñayivi (Mt. 15:32-39)

¹ Mé já nanditútú tucu cuahá ñayivi ta chí coó mé ñaha cuxu na. Anda já ñacana Jesús na xica tuun xihin á já ñacachi a já xihin ná:

² —Táhnda ndivaha ini i sahá ñayivi yóho jáchi sa ñaxinu uni quivi ndúu na xihin i yóho ta chí coó ga ñaha cuxu na.

³ Ta co cúnj chindahá i na nuhu na vehe na jáchi cámanj cuxu na ta tiahva náá cuitá na ta cuyu na íchi jáchi sa cánj ndivaha ñaquixi java na —ñacachi Jesús.

⁴ Anda já ñacachi na xica tuun xihin á cán já:

—Ndaa cáhan ndo. Ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —ñacachi na.

⁵ Anda já nandaca tuhún Jesús na já cáchí a já xihin ná:

—Ndaja pan cómí ndo.

Já nacachi na cán ja:

—Usa ña.

⁶ Anda ja nasahnda Jesús chuun nuú ñayivi ña ná cacoo na nu ñúhu. Já natiin a ndíhusa pan cán. Ta nandiquiahva ndixahvi nu Ndióxi. Já nasahnda java ña ta nasahan ña nuú na xíca tuun xíhin á cán ña ná ndicahnda na ña nuú ñayivi cuaha cán.

⁷ Ta jari nasacomí na java tíyacá valí ta nandiquiahva mé á ndixahvi nu Ndióxi saha ri ja nasahnda chuun nu ná ña ná ndicahnda na ri.

⁸ Ta naxixi tócó ndihi na ndúu cán anda quiahva nachutú tíxi na ta tá nandihi najachutú na janda usa toyicá xíhín ña nacandoo.

⁹ Tátuhun comi mil ñayivi naxixi. Ta tá nandihi ja najándindayí Jesús na.

¹⁰ Já nandihvi a ini barco xíhín na xíca tuun xíhin á ja naquee na cuahan na ñundáhyi cuéntá Dalmanuta.

Cúni na fariseo ña ná caja Jesús in ña xitúhún nu ná

(Mt. 16:1-4; Lc. 12:54-56)

¹¹ Anda ja naxinu na fariseo nu Jesús ja nacasahá ndítúhún na xíhin á. Ta sahá ña cúni na coto ndojó cuití ñahá na sahá ña cán quea naxica na nu á ña ná caja in ña xitúhún, ña quixi indiví ja ná candaa ini na á mé a ndaa cúú á ña nachindahá Ndióxi.

¹² Ndísaa ndísaa ini Jesús jachi ndíhi ini a xíhin ná ja cáchí a ja:

—Ndá saha quéa xíca na yóho ña ná caja i in ña xitúhún. Mé a ndaa ná cahan i xihín ndó ña a cája i ñaha xitúhún nuú na yóho —ñacachi a.

¹³ Anda já nandihvi tucu Jesús ini mé barco cán ta najándacoo a na cán já naquee a cuahan inga xoo tañuhú.

*Tá cahan Jesús sahá ña jánaḥa na fariseo
(Mt. 16:5-12)*

¹⁴ Ta ndaja coo nandindójo mé na xíca tuun xihín a cán cañehe na ñaha cuxu na joo ñasahjin in pan cuití va xihín ná ini barco cán.

¹⁵ Anda já ñasahnda Jesús chuun nu ná já cáchí a já xihín ná:

—Candehé ndo. Cuénta coo ndó xihín na fariseo ta xihín na cúu cuénta Herodes jáchi ña jánaḥa na cúu á tátuhun yúsa naḥaa ña cáva táhan na xihín harina cávaha na pan —ñacachi Jesús.

¹⁶ Coó ñacandaa ini na ña cáchí a ña cán quéa ñacasáhá ndítuhún xihín táhan na já cáchí na já:

—Sahá ña coó pan ñehé vaxí sahá ña cán quéa cahan Jesús ña yóho xoho —ñacachi na.

¹⁷ Sa ñacandaa ini Jesús ña cahan na ta já ñacasáhá cáchí a já:

—Mé ndó cáchí ndó ña coó pan ñehé vaxí jáchi co cándaa ini ndó ta ni co cája ndó cuénta sahá ña jánaḥa i. Nandaji tuun xini túni ndo.

¹⁸ Cúu ndó tátuhun na co tívi nuu xihín na coó johó jáchi vatí xini ndo ta xini johó ndó joo co cándaa ini ndó. Á co ndícuhun ini ndó ña ñacaja i

19 tá nandicahnda i ndíhuhun pan nuú uhun mil taa. Ndaja toyicá nanditaca nacaja ndó xihín ña nacandoo cán —nacachi Jesús.

Já nanducú ñehe na tuhún nu á:

—Uxu ivi ña.

20 Ta nacachi tucu Jesús xihin ná já:

—Ta tá nandicahnda i usa pan nuú comi mil ñayivi, ndaja toyicá nanditaca nacaja ndó xihín ña nacandoo —nacachi a.

Já nanducú ñehe na tuhun nu á:

—Usa ña.

21 Anda já nacachi a já xihin ná:

—Camaní yii va cándaá ini ndó —nacachi a.

Tá nandaja vaha Jesús in da cuaá ñuu Betsaida

22 Tá nandihi naxinu na ñuu Betsaida já ñehe na in da cuaá nacasaá na nu Jesús. Já naxica tahví na nu á ña ná cani ndaa ndáha á da.

23 Ta chí natiin a ndáha da cuaá cán já natavá a da yuhú ñuu. Nachindaa tójií a nduchú núu da já nachinúu a ndáha á jini dá. Já nandaca tuhún a da á cuu candehé da.

24 Ta já nacachi da cán já sándehe da:

—Sándehe e java taa joo tá quiahva ndaa yíto quiahva já ndaa da xica nuu da xini i —nacachi da.

25 Anda já nachinúu tucu Jesús ndáha á nduchú núu da já nasandehé ndaa da. Anda jávi nandivaha nduchú núu da ta nacasáhá sándehe cáxi vaha da tóco ndihi ñaha.

26 Ta nachindahá Jesús da cuanúhu da vehe da já nacachi a já xihin dá:

—A ndíhvún mahnú ñuu ni a ndícanún ña yóho nuú ñayivi ndúu jan —nacachi a.

*Tá cáxi tũhun ndaa Pedro ña cúú Jesús mé a
nachindahá Ndióxi cacomí cuéntá sahá ñayivi
(Mt. 16:13-20; Lc. 9:18-21)*

²⁷ Tá nãndihi já ñasahan Jesús xihín na xíca tuun xihín á ñuu válí ndácaan Cesarea cuéntá Filipo. Nani xíca na cuahan na íchi nãndaça tuhún a na já cáchí a já xihín ná:

—Ndá da cáchí ñayivi cúú yehe —ñacachi a.

²⁸ Já ñacachi na cán já:

—Java na cáchí na ña cúú ndó Juan, da ñacaja ndúta ñayivi. Ta java na cáchí na ña cúú ndó profeta Elías. Ta java na cáchí na ña cúú ndó in táhan profeta ñasanduu sanahá —ñacachi na.

²⁹ Anda já nãndaça tuhún tucu Jesús na já cáchí a já xihín ná:

—Ta ndóhó ri, ndá da cáchí ndo cúú u —ñacachi a.

Anda já ñacachi Pedro já xihín á:

—Mé ndó cúú Cristo, mé a nachindahá Ndióxi cacomí cuéntá sahá ñayivi —ñacachi da.

³⁰ Anda já ñasahnda Jesús chuun nu ná ña ná a cáxi tũhun na ña yóho nuú ni in ñayivi.

Cáxi tũhun Jesús ña quivi a

(Mt. 16:21-28; Lc. 9:22-27)

³¹ Anda já ñacasahá jánaħa Jesús nu ná ña tandaa quiví ndoho ndivaha ini mé á, da nachindahá Ndióxi nduu ñayivi. Ta na sacuaħa veñuhu xihín na sacuaħa nuú jutũ xihín na jánaħa ley Moisés candají na mé á jãnda quiaħva ná cahní ñahá na. Joo tá ná xinu unĩ quivĩ nditacu tucu a.

³² Cáxi ndivaha ñacahan Jesús ña yóho xihín ná ta chí anda já ñatavá xóo Pedro Jesús já ñacasahá jánani da a sahá ña ñacachi a xihín ná.

33 Joo naçava Jesús ta nandicoto nihni a nuú na xíca tuun xih̄in á já naçasáhá ndícuehe a xih̄in Pedro já cáchí a já xih̄in dá:

—Cuáhán quee Satanás, rí cúú tiñáhá saçuaha. Co ín xíní túnun tá quiahva ín xíní túní Ndióxi jáchi cáhvi inún tá quiahva cáhvi ini ñayivi ñuyíví yóho — naçachi a.

34 Anda já naçana Jesús na xíca tuun xih̄in á xih̄in java ga ñayivi já naçachi a já xih̄in ná:

—Ndá na cúní candico yehe ndítahan nu ná ndihi chága ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coó caja toho a ná quivi na sahá i.

35 Jáchi ndá na cátóo coo chága ñuyíví yóho ndihi saha ná. Joo ndá na sahan ndeé ini quivi sahá i xih̄in sahá tuhun Ndióxi, ñehe táhvi ná catacu na anda ama cáa quivi.

36 Vatí ná quee vaha in na ñuyíví yóho ta cómí na tóco ndihi ñaha ñuyíví joo ndá chuun queá tá nu ndíhí ndihi saha ná indayá.

37 Jáchi ni in ñaha a cuú चाहvi in na saha ínima ná ná a cuhun na indayá.

38 Candehé ndo. Mé tiempo viti cája ñayivi cuahá cuachi ta co xéen na caja na ña sáhdá Ndióxi nu ná. Ta ndá na cácahan nuu sahá i xih̄in sahá tuhun vaha cáhan i quiahva já cacahan ri nuú yehe, da nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán nahá ndaja cáhnu cúú yehe jáchi quixi i xih̄in ndée Ndióxi ta xih̄in ndée táto yii mé á viti —naçachi Jesús.

9

¹ Ta ñacachi tucu Jesús já xihín ná:

—Mé a ndaa ná cahan i xihín ndo. Java na ndúu yóho a quívi toho na janda quiahva ná xinu quivi cuni na cacomí Ndióxi cuéntá sahá ñayivi xihín ndéé mé á —ñacachi a.

*Tá nandijama Jesús quiahva cáa
(Mt. 17:1-13; Lc. 9:28-36)*

² Tá ñayaha iñu quivi já nandaa Jesús in yucú jícó ta ndáca táhan Pedro xihín Jacobo xihín Juan cuahan na xihín á. Ta nu táhyí mé na cán nandijama quiahva cáa.

³ Ta a juú quiahva nandiyehé jáhma ndíxi a chí nandiyaa cachí ña. Ni in ñayivi ñuyívi yóho a cuú ndicata yaa nahá jáhma tá quiahva yaa nanduu jáhma á.

⁴ Anda já na xíca tuun xihín Jesús ñaxini na Elías xihín Moisés ndúu na ndítuhún na xihín á.

⁵ Ta já ñacachi Pedro já xihín Jesús:

—Maestro, vaha cúu ndúu ndé yóho jáchi já cuu cavaha ndé uní vehe tiyahvá válí. In a coo mé ndó ta inga coo Moisés ta inga coo Elías —ñacachi da.

⁶ Nayihví ndivaha na xíca tuun xihín Jesús sahá ña cán queá co xíni mé Pedro ndía cáa cáhan va da.

⁷ Anda já ñanuu in vico jata ná já najajahvi a na ta tañu vico cán ñaxini johó na ña cáhan in a já cáchí a já:

—Da yóho cúu jahyi maní i. Cuni johó ndó nu cáhan da.

⁸ Ta tá nandicoto nihni na sa coó ga na ñaxini na ta jandá in túhún Jesús ñaxini na.

⁹ Tá sa cuahān nuu na jini yúcu cán já nasahnda Jesús chuun nu ná ña ná a cáxi tuhun na nuú ñayivi ña naxini na anda quiahva ná xinu quivi nditacu tucu mé a nachindahá Ndióxi nduu ñayivi.

¹⁰ Sahá ña cán quéa nachijehé tuhun na sahá joo nandituhún xihin táhan na ndia cuni cachi Jesús tá nacachi a ña nditacu tucu a.

¹¹ Anda já nacasáhá ndaca tuhún na mé á já cáchi na já xihin á:

—Ndávaha cáchi na jánaha ley Moisés ña ndítahan quixi jihna ñúhú profeta Elías —nacachi na.

¹² Já nacachi Jesús já xihin ná:

—Mé a ndaa jihna ñúhú quixi Elías ta ndaja vaha ndihi da ñaha. Á co xini ndó ndá quiahva cáchi tuhun Ndióxi sahá da chindahá Ndióxi nduu ñayivi. Cáchi a ña ndoho ini da ta candají na da.

¹³ Joo cáxi tuhun i nu ndó ña sa naquixi va Elías ta nacaja na tá quiahva cuni mé va na xihin dá ta tá quiahva cáchi tuhun Ndióxi ndoho da quiahva já nandoho da —nacachi Jesús.

Tá nandaja vaha Jesús in taa loho ndacaan ínima quini ini

(Mt. 17:14-21; Lc. 9:37-43)

¹⁴ Tá nandihí já nandicó coo Jesús xihín na cán nu ndúu java ga na xica tuun xihin á cán. Já naxini na cuahá ndivaha ñayivi nacava nuu na na cán. Jári ñúhu java na jánaha ley Moisés cáni táhan yúhu ná xihín na xica tuun xihín Jesús.

¹⁵ Tá naxini ñayivi yóho Jesús chí nacatontó ndihi na já nandava nihni na nasahan na cáhan Ndióxi ná xihin á.

16 Andá já nandaca tuhún Jesús na já cáhí a já xihín ná:

—Ndá saha ndítuhún ndó xihín na jan —nacachi a.

17 In da cándichi cán nanducú ñehe da tuhun nu Jesús já cáhí da já:

—Maestro, yóho ñehe e jahyí i nacasaá i nu ndó jáchi ndácaan in ínimá quini ini da ta nandaja níhi ñahá ri.

18 Ndá nacuu tíin rí da, jándacava rí da nu ñúhu ta já casáhá cána cuyu chiquiñu yúhu dá ta cáhñá nuhu dá. Xihín ña yóho casáhá jácuitá rí da. Ta sa naxica i ñamaní nuú na xica tuun xihín ndó ña ná tavá na mé ínimá quini yóho joo coó nacuu caja na ña —nacachi da.

19 Já nacachi Jesús já xihín ná:

—Ndáhví nahá nacuu ndó jáchi sa cuahá ndivaha quivi íin i xihín ndo ta a ñaha candeé ini ndó yehe. Ta chí co ndeé ga ini i xihín ña cája ndó. Taxi ndó da loho jan chóho —nacachi a.

20 Chí ñehe na da loho cán nasaa na nu Jesús. Ta tá naxini mé rí quini ndácaan ini da loho Jesús ivi laá nacaja rí ña ná quivi yihí da loho cán já tíví núu da nandicava da nu ñúhu xihín chiquiñu cána yúhu dá.

21 Andá já nandaca tuhún Jesús tátá da cán já cáhí a já xihín dá:

—Á sanahá ndóho jahyún ña yóho —nacachi a.

Já nacachi tátá da cán já:

—Janda tá loho da cája rí já xihín dá.

22 Ta cuahá tañu chicaan rí quini da ini yávi núhu xihín ini ticuí viti ña cahní ñahá ri cúní ri. Ña cán queá xica tahví i nu ndó ña ná candáhví loho ini

ndó ndehe ta chindeé ndó ndehe tá ta cuu caja ndó ña —ñacachi da.

²³ Anda já cáchí Jesús já xihín dá:

—Cuu caja i ña tá cándúsún yehe. Jáchi cuu caja i tóco ndihi ñaha xihín ñayivi tá cándeé ini na yehe —ñacachi a.

²⁴ Ivi laá ñacayuhú tátá mé da loho cán já cáchí da já:

—Cándúsa vi joo chindeé ndó yehe ná candúsa chága i —ñacachi da.

²⁵ Ta tá ñaxini Jesús ña ñacasáhá chútú cuahá ñayivi já nandicuehe mé á xihín mé rí quini cán já cáchí a já xihín ri:

—Ínima quini, rí nandaja níhi ta nandaja jóho da loho yóho, sáhdá i chuun nuun ña ná queún cuhun ta a ndíco coo gaún ndihvún ini da —ñacachi a.

²⁶ Anda já ñacayuhú cóhó rí quini cán já ñasahní yihí tucu rí da. Chí ñaqueta rí cuahan rí ta najándacoo rí da loho cán tátuhun in ndii sahá ña cán queá ñacasáhá cáchí ñayivi ña sa ñaxihí va da jan.

²⁷ Joo ñatiin Jesús ndáha dá já nandiñehe a da. Ta já nandaca ndichi da cán.

²⁸ Ta tá nandihvi Jesús ini in vehe xihín na xíca tuun xihín á já nandaca tuhún jehé na mé á já cáchí na já xihín á:

—Ndávaha coo ñacuu caja ndehe tavá nde ínima quini ñasandacaan ini da loho jan —ñacachi na.

²⁹ Já ñacachi Jesús já xihín ná:

—Tá cúni ndó tavá ndo tá ínimá quini táhan rí yóho ndítahan cajuhun ndó ta caça tahví ndo nu Ndióxi —nacachi a.

*Cáxi tūhun tucu Jesús ndaja coo nuú quivi a
(Mt. 17:22-23; Lc. 9:43-45)*

³⁰ Tá naquee na cuahan na nayaha na chí estado Galilea ta co cúni Jesús ña ná candaa ini ñayivi

³¹ jáchi jánaḥa Jesús nuú na xíca tuun xihin á cúni a. Ta cáchí a xihin ná ña vaxi quivi ndiquiahva ñayivi mé á, da nachindahá Ndióxi nduu ñayivi ndahá ñayivi ta cahní ñahá na joo tá ná yaha uní quivi nditacu tucu a.

³² Joo coo nacandaa ini na ña cáhan xihin ná ta yíhví na ndaca tūhún na mé á sahá tūhun cáhan.

*Ndicani Jesús ndá na cúu na in chága saha
(Mt. 18:1-5; Lc. 9:46-48)*

³³ Ta ndaja coo naxinu na ñuu Capernaum ta tá sa ndúu na vehe já nacasáhá ndáca tūhún Jesús na xíca tuun xihin á já cáchí a já xihin ná:

—Ndiá ndítúhún ndó saha tá vaxi ndó íchi —nacachi a.

³⁴ Joo coo nanducú ñehe na cán tūhun nu á jáchi íchi nuú naquixi na nanditúhún cuaha ná saha ndá da cúu da cáhnu chága tañu mé ná.

³⁵ Anda já nasaco Jesús já nacana ndíhuxu ivi da xíca tuun xihin á já nacasáhá cáchí a já xihin dá:

—Ndá ndó, na cúni cacuu na nu cuítí ndítahan ndaja núu ndó mé ndó cacuu ndó na nu ndíhí ta caja ndíví ndo nu ndíhi na —nacachi a.

³⁶ Tá nandihí já nacana Jesús in da loho já nasacu a da mañú nu ndúu na já nasañehe ndaa da já nacasáhá cáchí a já:

³⁷ —Ndá nā ná ndiquehe vaha in da loho tátuhun da yóho sahá ña quíhvi ini na yehe, ndiquehe ri na yehe viti. Ta ndá nā ndiquehe yehe, a juú in túhún yehe ndiquehe na vaha jáchi ndiquehe ri na tátá i, mé a nachindahá yehe —ñacachi a.

Tá ndúu java nā ndiquehe saha yo já quéa cuahan na xoo í

(Mt. 10:42; Lc. 9:49-50)

³⁸ Anda já ñacachi Juan já:

—Maestro, ñaxini nde in dataa ta cáhan da quivi mé ndó já tává da ínima quini ñúhu ini ñayivi. Joo cō xica nuu da xihín yo sahá ña cán quéa ñasaji nuu nde nū dá caja da ña —ñacachi da.

³⁹ Joo ñacachi Jesús já:

—A cáji nuu ndó nū dá jáchi tá cája in na ña xitúhún xihín quivi i já quéa a cuú caca nuu na cahan núu na sahá i.

⁴⁰ Jáchi ndá nā cō ndíndita caja xíxi xoho, mé nā cán cuahan nā xoo mí.

⁴¹ Ta ndá nā ná quiahva in ñaha nū ndó vatí in yáxi ticuú sahá ña ndícō ndó yehe mé a ndaa ná cahan i xihín ndo ña chahvi tá chahvi Ndióxi sahá ñamaní cája na xihín ndó —ñacachi Jesús.

Tá jándacava ñayivi inga na nuú cuachi

(Mt. 18:6-9; Lc. 17:1-2)

⁴² Ta cáchi tucu Jesús já:

—Ndá nā ná jándacava in nā ndahví, nā cándéé ini yehe nuú cuachi janda vaha chága ná candicō in yuú yojó jicō ná ta ná ndihi sahá nā cahá tañuhú.

⁴³ Tá ndáha ndo quéa jándacava ndohó nuú cuachi chitúhún ndó a jáchi vaha chága ná cuhún ndó indivi xihín in túhún ndáha ndo a juú ga cuhún

ndó xih̄in ndíví ndáha ndo indayá nuú cō ndáhva ñúhu cáyi.

⁴⁴ Ta cán ni ticujú cō xih̄i ni ñúhu cáyi cō ndáhva.

⁴⁵ Tá saha ndo quéa jándacava ndohó nuú cuachi chitúhun rí ndó ña jan va jáchi vaha chága ná cuhun réncō ndó indiví xih̄ín in túhún saha ndo a juú ga cuhun ndó xih̄in ndíví saha ndo indayá nuú cō ndáhva ñúhu cáyi.

⁴⁶ Ta cán ni ticujú cō xih̄i ta ni ñúhu cáyi cō ndáhva.

⁴⁷ Tá nduchú nuú ndó quéa jándacava ndohó nuú cuachi tavá ndó ña jáchi vaha chága ná coo cóhó nuú ndó cuhun ndó nuú cacomí Ndióxi cuéntá saha ndo a juú ga ña ná coo ndíví nduchú nuú ndo cuhun ndó indayá.

⁴⁸ Ta cán ni cō xih̄i ticujú ta ni ñúhu cáyi cō ndáhva.

⁴⁹ Tá quiahva ndíví jjuhún cuáán cája ñúhu cáyi quiahva já ndíví ínima ñayivi xih̄ín ña ndóho ini na. Ta tóco ndihi ñaha jócō na nu Ndióxi chícaan na ñii yívi na já cō tíví a.

⁵⁰ Vaha va cája ñii jáchi xih̄ín ñii ndíhaji ña xíxi na joo tá cō óhva ña já a cuú caja ohva tucu yó a já ná caja chúun tucú ña. Ndítahan nu ndóhó caja ndó tátuhun cája ñii ta já canduu víi xih̄in táhan ndó — cáchí Jesús.

10

Jánaḡa Jesús nuú na sa natandaha ña cō ndítahan jándacoo táhan na

(Mt. 19:1-12; Lc. 16:18)

¹ Naḡee Jesús ñuu Capernaum cuahan. Já naḡahan estado Judea xih̄ín ñundáhyi ín inga xoo

yuta Jordán. Cán naçasáhá nanditaca tucu ñayivi nu á chí jánaha tucu a na tá quiahva naçaan mé á cãja.

² Anda já naçayati java na fariseo nu Jesús sahá ña coto ndojó ñahá na cúni na. Naçachi na já xihin á:

—Á núná nuú in dataa jándacoo da ñájíhí da — naçachi na.

³ Já nanducú ñehe Jesús tuhun nu ná já cáchí a já xihin ná:

—Ndaja cáchí ley Moisés ña ndítahan caja ndó — naçachi a.

⁴ Anda já naçachi na cán já:

—Tá ná quiahva in dataa in tutu nu ñájíhí da sahá ña cúni da jándacoo da ña já quea sahan ley Moisés ñamaní jándacoo da ña —naçachi na.

⁵ Anda já naçachi Jesús já xihin ná:

—Sahan ley Moisés ñamaní yóho nu ndo jáchi táhyí ndivaha ínimã ndo.

⁶ Joo janda mé sahá tá naçavaaha Ndióxi ñayivi nu cuítí já naçavaaha in túhún ta xihín in túhún ñáha.

⁷ Sahá ña cán quea ndítahan nuú dataa jándacoo da tátá da xihin náná da já ndique táhan da xihin ñájíhí da.

⁸ Já xinu ndíví na cán cacuu na tátuhun in víxí yiquí cuñu na sahá ña cán quea co cúu ga na ivi yiquí cuñu sahá ña nanduu na tátuhun in túhún yiquí cuñu.

⁹ Sahá ña cán quea co ndítahan nuú na cán janí táhan na ña najácatáhan Ndióxi tá natandaha ná — naçachi Jesús xihin ná.

10 Ta tá nandicó cōo tucu na vehe já nacasáhá tucu na xíca tuun xihín á cán ndáca tuhún na Jesús sahá ña nacahan.

11 Ta nanducú ñehe Jesús tuhun nu ná já nacachi a já:

—Tá ná jándacoo in dataa ñájíhí da ta tándaha dá xihín inga ñáñáha já quéa cája da cuachi nu ñájíhí nuú da jáchi ín da xihín inga ñáha.

12 Ta tá ná jándacoo in ñáñáha yí ña ta tándaha ña xihín inga da cája ri ñá cán va cuachi nu yí ña jáchi ín ña xihín inga dataa —nacachi Jesús.

Cája yí Jesús na valí

(Mt. 19:13-15; Lc. 18:15-17)

13 Anda já ñehe na java na valí nacasaá na nu Jesús ña ná cani ndaa ndáha á na. Joo mé na xíca tuun xihín á cán nacasáhá na cája cuehe na xihín mé na ndáca na valí cán.

14 Tá naxini Jesús ña cája na já nandicuehe a já cáchí a já xihín na xíca tuun xihín á:

—Quiahva ndó ñamani ná quixi na valí nuú i ta a cájí nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho.

15 Mé a ndaa ná cahan i xihín ndo ndá na cō cūni ndiquiahva na mé ná ndáha Ndióxi tátuhun cája na valí yóho já quéa a cúu cacomí Ndióxi cuéntá saha ná —nacachi a.

16 Anda já nacasáhá Jesús ñehe ndaa na valí ta chínúu a ndáha á jiní ná já cája yí á na.

Cahan in da cuicá xihín Jesús

(Mt. 19:16-30; Lc. 18:18-30)

17 Tá cuahan tucu Jesús íchi já xínu in dataa nacasaá da nasaxítí da nu á já cáchí da já xihín á:

—Maestro, mé ndó cúú ndó taa vaha ña cán quéa ndáca tuhún i ndohó ndía ndítahan caja i já ná ñehe táhvi cuhun i indiví coo i anda ama cáa quivi — nacachi da.

¹⁸ Já nacachi Jesús já xihin dá:

—Ndá cuéntá quéa cáchún xihin i ña cúú u da vaha. Ni in tuhún toho ñayivi coo cúú ná na vaha ñuyivi yóho. In tuhún Ndióxi cuiti va quéa vaha.

¹⁹ Sa xini vún ña sáhdá Ndióxi nuun cajún já cáhí a já: “Coto a cóún xihin ñájíhí á yí ñani táhún. Coto a cáhnún ndii. Coto a cája cuíhnún. Coto a cáhún ña tuhún sahá ñayivi. Coto a jándahvún ñayivi. Ta caja cáhnún tátún xihin nánún” — nacachi Jesús xihin dá.

²⁰ Já nacachi da cán já:

—Maestro, janda tá nasacuu u taa loho nacasáhá i cája i tóco ndihi ña sáhdá Ndióxi caja i — nacachi da.

²¹ Nasandehé Jesús nu dá ta táhdá ini a saha dá já nacachi a já xihin dá:

—Inga ñaha cámani cajún: Cuáhán jicún tóco ndihi ñahún jan ta ndacahndún jiuhún jan nuú na ndahví já ñehe táhvun coo cuahá ñahún indiví. Ta tá nandihí já quisún candicún yehe — nacachi Jesús.

²² Joo tá naxini johó da cuicá cán ña nacachi Jesús ivi laá nacavitá ini da já naquee cuéha dá cuahan da jáchi ín cuahá ndivaha ñaha da.

²³ Anda já nacasáhá sándehé Jesús nuú na xica tuun xihin a cán já nacachi a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná — nacachi a.

²⁴ Chí nacatóntó mé na xíca tuun xihin á cán sahá tuhun nacahan joo nandicahan tucu Jesús já cáchí a já:

—Jahyi a, ndaja yáncá cáa sahá in na cándéé ini jiuhún ndiquiahva na mé ná ndaha Ndióxi ña ná cacomí a cuéntá saha ná.

²⁵ Jáchi janda cama chága cuu yaha in camello ini in yávi saha yítucú a juú ga ña ná ndiquiahva in da cuicá mé dá ndaha Ndióxi ña ná cacomí a cuéntá saha dá —nachachi Jesús.

²⁶ Anda já nacatóntó ndihi mé na xíca tuun xihin á cán tá naxini joho na ña yóho. Já nacasáhá ndaca tuhún táhan na já cáchí na já:

—Ndá na cúu na cuu cacu ndaa ínima, dá já —nachachi na.

²⁷ Nandicoto nihni Jesús nu ná já cáchí a já xihin ná:

—Ni in na a cúu caja ña yóho joo Ndióxi quéa cuu caja ña jáchi ni in ñaha co íhvi toho nu Ndióxi —nachachi a.

²⁸ Anda já nachachi Pedro já xihin Jesús:

—Joo ndehe najándacoo ndihi nde ña nasacomí nde ta ndíco nde ndohó —nachachi da.

²⁹ Já nanducú ñehe Jesús tuhun nu ná já cáchí a já:

—Mé a ndaa ná cahan i xihin ndo ña nda na jandacoo vehe na á ñani na á quiahva na á tátá na á náná na á ñájíhi na á jahyi na á ñundáhyi ná sahá yehe xihin sahá tuhun cahan i,

³⁰ na cán cúu na ñehe cuaha chága ví ñaha ñuyívi yóho jatá ña najándacoo na tátuhun vehe na, ñani na, quiahva na, náná na, jahyi na, ñundáhyi ná viti vatí ná ndicuíta ñayivi caja xíxi na xihin ná. Joo

ñehē táhvi ná catacu na anda ama cáa quivi xihin Ndióxi.

³¹ Ta ndúu cuahá na ín sahá ñuyívi yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyívi yóho viti joo vaxi quivi cacuu na na ín saha nu Ndióxi —nacachi a.

*Cáxi tuhun tucu Jesús ña quivi a
(Mt. 20:17-19; Lc. 18:31-34)*

³² Ta ndaja coo cuahan Jesús xihin na xica tuun xihin á chí íchi ndáa cuahan chí Jerusalén. Cánuu Jesús cuahan xihin ná. Ta nacatontó na cán ta yíhvi na cuahan na xihin á. Anda já natavá xoo tucu a ndíhuxu ivi na xica tuun xihin á já nacasahá cáhan xihin ná ña ndoho a chága chí nuu.

³³ Já nacachi a já:

—Candehé ndo. Yóho ndáa í cuahan yo chí Jerusalén nuú ndiquiahva na yehe, da nachindahá Ndióxi nduu ñayivi ndahá na sacuahá nuú jutú xihin nuú na jánaha ley Moisés. Na yóho cúu na cacu ini sahá ndaja quivi i. Anda já ndiquiahva na yehe ndahá na tóho.

³⁴ Cuacu ndaa na yehe ta caní na yehe ta cuihna na tójí na nuú i ta já cahní na yehe. Joo tá ná yaha uní quivi nditacu tucu u —nacachi Jesús xihin ná.

*Tá naxica Jacobo xihin Juan ñamaní nu Jesús
(Mt. 20:20-28)*

³⁵ Anda já nacayati Jacobo xihin Juan, jahyi Zebedeo nu Jesús já nacachi da já xihin á:

—Maestro, cúni nde caça nde in ñamaní nu ndo —nacachi da.

³⁶ Já nacachi Jesús já xihin dá:

—Ndíá maní cúní ndó caja i xihín ndo —nācachi a.

³⁷ Já nācachi da cán já xihín á:

—Ñā xíca nde nu ndo quéa ná quiahva ndó ñamaní nuú nde cacoo in in nde xoo jíin ndo. In nde coo xoo cuáha ta in nde coo xoo íti jíin mé ndó indiví nuú coo ndó cacomí ndó cuéntá sahá ñayivi —nācachi da.

³⁸ Anda já nācachi Jesús já xihín dá:

—Co cándaā ini ndó ñā xíca ndó nuú i. Á cuu ndoho ini ndó tá quiahva ndítahan nuú i ndoho ini i. Jáchi ñā vaxi nuú i ndoho ini i cúú á tátuhun coho i in yáxi ndutá ova. Á íin tiahva ndó ndoho ini ndó tá quiahva ndítahan nuú i ndoho ini i anda quiahva ná quivi i —nācachi a.

³⁹ Já nācachi da cán já:

—Cuu caja nde ñā.

Já nācachi Jesús já xihín dá:

—Mé a ndaa tandaa quivi coho ndó ñā ova ñúhu ini yáxi, mé ñā coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i.

⁴⁰ Joo sahá ñā cacoo in ndó xoo cuáha i ta in ndó xoo íti i a juú nuú i quiahva i ñā nu ndo. Jáchi sa nādicaxi Ndióxi na ñehe táhvi cacoo cán —nācachi Jesús xihín dá.

⁴¹ Tá naxini johu uxu chága na xíca tuun xihín Jesús cán ñā yóho já nācasáhá xójo ini na xihín Jacobo xihín Juan viti.

⁴² Joo nācana Jesús na já nācachi a já xihín ná:

—Sa xíní ndó ndaja cája na sáhndá chuun nuú ñayivi ndúu ñuyíví yóho. Ña cája na quéa jácandíhi na ñayivi ta cája na tá quiahva cúni mé ná.

⁴³ Joo co ndítahan coo ña cán tañu mé ndó jáchi ndá da cúni cacuu da cáhmu chága tañu ndó xíní ñuhú cacuu da in da cája ndíví nuú ndihi ndó.

⁴⁴ Ta ndá da cúni cacuu taa nu cuítí tañu ndóhó ndítahan cacuu da da cája ndíví nu ndihi ndó.

⁴⁵ Jáchi ni yehe, da nachindahá Ndióxi nduu ñayivi coo ñaquixi i ñuyíví yóho ña ná caja ndíví ñayivi nuú i. Ña ñaquixi i caja i quéa caja ndíví i nu ná ta ndiquiahva i mí i quivi i já ná cuu cacu ndaa ínimá cuahá ñayivi ná a cùhun na indayá —ñacachi a.

Tá nandaja vaha Jesús in da cuáá naní Bartimeo (Mt. 20:29-34; Lc. 18:35-43)

⁴⁶ Anda já ñaxinu na ñuu Jericó. Ta tá sa ñaqueta tucu Jesús cuahan jatá ñuu cán xihín na xíca tuun xihin á xihín cuahá ga ñayivi ta mé yuhú íchi cán íin coo in da cuáá naní Bartimeo, jahyi Timeo sáti da.

⁴⁷ Ta tá ñaxini johó da ña cáyati Jesús, da ñuu Nazaret vaxi da já ñacasáhá mé da cuáá cán cáyuhú cóhó da já cáchí da já:

—Jesús, da ñaquixi chichi David caja ndó ñamaní candáhví loho ini ndó yehe —ñacachi da.

⁴⁸ Joo ñacasáhá cuahá ñayivi cája cuehe na xihin dá ña ná caji da yuhú dá. Joo ví ga ví cáyuhú da já cáchí da já:

—Ndóhó, da ñaquixi chichi David caja ndó ñamaní candáhví loho ini ndó yehe —ñacachi da.

⁴⁹ Anda já nandaca ndichi Jesús já ñacachi a já:

—Cana ndó da ná quixi da.

Já naçana na da cuaá cán já cáchi na já xihin dá:

—A ndícani inún. Candichi jáchi cána Jesús yohó
—naçachi na.

⁵⁰ Anda já najácana da cotó ndeé da ta nandaca
ndichi da já naçaa da nu ín Jesús.

⁵¹ Anda já nandaca tuhún Jesús da já cáchi a já
xihin dá:

—Ndía cúnun ná caja i xuhun.

Já naçachi mé da cuaá cán já:

—Candehé e cúnj, xitoho.

⁵² Já naçachi Jesús já xihin dá:

—Cuu nuhu vún viti. Sa nandivahún jáchi
naçandéé inún yehe —naçachi a.

Chí ivi laá nandaca ndehé da cuaá cán. Já
nandico da Jesús íchi cán cuahan da.

11

Ndihvi Jesús ñuu Jerusalén

(Mt. 21:1-11; Lc. 19:28-40; Jn. 12:12-19)

¹ Tá naxinu na yati ñuu Jerusalén jín ñuu Betfagé
xihín ñuu Betania ña ndíque táhan nuu xihin yúcu
yitó Olivo já naçahnda Jesús chuun nuú ivi da xíca
tuun xihin á.

² Já cáchi a já xihin dá:

—Cuáhán ndo ñuu loho ndácaan yati jan. Tá ná
xinu coo ndó jan ndiñehé ndó in búrrō ndíco ndaa,
rí cámanj yij ndaa na. Ndaxí ndó rij ta cañehé ndó
rij quixi ndó.

³ Ta ndá na ná ndaca tuhún ndohó saha rij já quéa
cachi ndó xihin ná ña xini ñuhú xitoho ndó rij viti
joo tá ná ndihi chuun rí já ndixi tucu rí, já cachi
ndó xihin ná —naçachi Jesús xihin da.

4 Ta na_quee da cán cu_han da já nandiñe_he dá mé búrr_o cán ndíco ndaa rí jíin yéhe yuhú íchi já nandaxí da ri.

5 Ta ndaja coo java na ndúu cán na_casáhá cáchi na já:

—Ndía cája ndó. Ndávaha ndáxí ndo búrr_o jana nde jan —na_cachi na.

6 Anda já nanducú ñehe mé da xíca tuun xih_in Jesús cán tuhun nu ná ta na_cachi da tá quiahva na_cachi Jesús xih_in dá. Anda já nañe_he dá ñamani cañehe da rí cu_hun da.

7 Tá nandihi já ñehe da búrr_o cán na_casa_a da nu Jesús já na_chojó da cotó ndée da jata ri já ndaa Jesús jata ri.

8 Ta cu_hhá ñayivi na_casáhá na ch_induu na cotó ndée na íchi ta java na na_casáhá na sáhndá na ndáha yíto já ch_induu na do íchi.

9 Ta na cu_han chí nuu ta jári na va_xi chí jata na_casáhá na cáyuhú na já cáchi na já:

—Cája cáhnu í Ndióxi. Ndicáhnu nahá ná cacuu da cómi cuéntá saha yo jáchi cúú dá da va_xi yuhú nuu Ndióxi.

10 Cáhnu ná coo quiví tá casáhá Ndióxi cacomí a cuéntá saha yo. Tá quiahva na_sacomí David, tátá yo cuéntá sahá ñayivi sanahá quiahva já cacomí mé á cuéntá saha yo. Cáhnu ná cacuu Ndióxi —cáchi ñayivi.

11 Anda já nandihvi Jesús ñuu Jerusalén ta já naxinu a veñuhu cáhnu cán. Ta tá nandihi na_sandehé ndihi a níi xoo cán já na_quee a cu_han chí ñuu Betania xih_in ndíhuxu ivi na xíca tuun xih_in á jáchi sa nahini ta cu_han cuáá va.

*Tá naxhicaan Jesús cháhan jata titó ñuhú
(Mt. 21:18-19)*

12 Tá naqee na Betania inga quivi itaan já nacasáhá cuico Jesús cuahan.

13 Tá naxini xíca a in titó ñuhú vaha dó ndoco ndáha. Nasahan Jesús sándehe a á in cuihi nu do joo co rí ná ñehe a. Ndáha uun va dó cán in jáchi a juú tiempo coo rí cán queá.

14 Anda já naxahan Jesús xihín titó ñuhú cán já cáchi a já xihín do:

—Ni in ga na a cáxi ga cuihi nu yóhó —cáchi a xihín do.

Ta naxini johó na xíca tuun xihín á cán tuhun yóho.

*Tá naxaxí Jesús na ndúu jíco ñaha yéhe veñuhu
(Mt. 21:12-17; Lc. 19:45-48; Jn. 2:13-22)*

15 Tá nandihí já naxinu na Jerusalén. Ta tá nandihvi Jesús veñuhu cáhnu cán já nacasáhá táxi a na ndúu jíco cán xihín na ndúu xéen viti. Ta naxicó ñehe a mesa na ndúu ndíjama jjuhún ñayivi ta naxicó ñehe a táyi sácco na ndúu jíco ndíjata.

16 Ta chí coo nasahan ñamaní nuú ñayivi cañehe na ñaha ndihvi na veñuhu.

17 Anda já nacasáhá jánaha nu ná já cáchi a já xihín ná:

—Já cáchi tuhun Ndióxi: “Vehe mí i cacuu a vehe nuú quixi na caça tahví na nuú i saha tóco ndihí ñayivi ñuyívi”, cáchi tuhun Ndióxi. Joo ndóhó nandai cuu ndó yóho caxa cuíhna ndo nuú ñayivi —naxachi Jesús xihín ná.

18 Tá mé na sacuaha nuú jutú cán xihín na jánaha ley Moisés naxini johó na ña yóho já nacasáhá na

ndúcú nā ndá quiahva cahní nā a jáchi yíhví ñahá nā sahá ña cátóntó ndihi ñayivi xihín ña jánaḥa mé á nu ná.

¹⁹ Joo tá naçuaá já naquee Jesús ñuu cuḥan xihín nā xíca tuun xihín á.

*Tá nahichí titó ñuhú, dó coó cuihi nuu
(Mt. 21:20-22)*

²⁰ Ta naha chá inga quiví itaan nayaha na nu cándichi mé titó ñuhú cán já naḥini na ña nahichí do janda yóho do nahichí.

²¹ Anda já nandicuhun ini Pedro saḥa mé titó ñuhú já cáhí dā já xihín Jesús:

—Maestro, candeḥé ndó titó ñuhú, dó naçahan cueḥe ndó xihín. Sa nahichí dó viti —naçachi da.

²² Já naçachi Jesús já xihín dá:

—Candeé ini ndó Ndióxi.

²³ Jáchi mé a ndaa ná çahan i xihín ndo ña tá ná cachi ndó xihín yúcu yóho: “Caxoo ta cuáhán jáquetún mún ini tañuhú”, ta tá co cáhvi ivi joho ini ndó ta tá candúsa ndó coo tá ín cáhí ndó ta chí já ndusa coo.

²⁴ Sahá ña cán quéa cáhí i xihín ndo ña tóco ndihi ñaha xíca taḥví ndó nu Ndióxi ta tá cándúsa ndó ña sa nañeḥe ndó a já quéa ñeḥe ndusa ndó a.

²⁵ Ta tá ndúu ndó xíca taḥví ndo nu Ndióxi xíní ñuhú caja cáhnu ini ndó saḥa ndá nā xójō iní ndó xihín já ná caja cáhnu ri ini Ndióxi, tátá ndo ña ín indiví saḥa cuachi ndó.

²⁶ Joo tá co cája cáhnu ini ndó saḥá ñayivi já quéa ni Ndióxi, tátá ndo ña ín indiví a cája cáhnu ini a saḥa cuachi ndó —naçachi a.

Tá nandaca tuhún na Jesús ña ndáchí quixi ndéé á ña cája cuahá nuú ñaha

(Mt. 21:23-27; Lc. 20:1-8)

²⁷ Anda já nandicó coo tucu na ñuu Jerusalén. Ta tá xíca Jesús chí veñuhu cáhnu cán já nacayati na sacuahá nuú jutú xihín na jánaḥa ley Moisés xihín na sacuahá veñuhu nu á.

²⁸ Já nandaca tuhún na Jesús já cáchí na já xihín á:

—Yo já sáhan ñamani nuun cajún ña cájún yóho —nacachi na.

²⁹ Já nacachi Jesús já xihín ná:

—Ná ndaca tuhún ri yeḥe va ndohó ta tá ná nducú ñeḥe ndó tuhun nuú i anda já caxi tuhun i nu ndo yo já nasahan ñamani nuú i caja i ña cája i yóho.

³⁰ Cachi ndó xihín i yo já nachindahá Juan ña ná quixi da caja ndúta da ñayivi. Á Ndióxi nachindahá da, á ñayivi nachindahá ñahá. Nducú ñeḥe quí ndó tuhun nuú i viti —nacachi Jesús xihín ná.

³¹ Anda já nacasáhá ndítuhún xihín táhan na cán já cáchí na já:

—Tá ná cachí ña Ndióxi quéa nachindahá Juan ta já nducú neḥe Jesús tuhun nu yo já cachi da xoho: “Ndá cuénta quéa coo naxeen ndó candúsa ndó da, dá já”, cachi Jesús xoho.

³² Ta tá ná cachí: “Ñayivi cúu na nachindahá Juan”, já ndicuíta ñayivi xihín yo —nacachi na ndítuhún xihín táhan na.

Já cáchí na jáchi yíhvi na ñayivi jáchi tóco ndihi ñayivi nacahán na saḥa Juan ña cúu dá da

nachindahá Ndióxi jáyaha da tuhun cáhan mé á nuú ñayivi.

³³ Sahá ña cán quéa ñacachi na já xihin Jesús:

—Cō xini toho nde yo nachindahá Juan.

Anda já ñacachi a já xihin ná:

—Ta ni yehe a cáxi tuhun i nu ndo yo já nasahan ndée nuú i caja i ña yóho —ñacachi a.

12

Sácú Jesús quiahva sahá java mozo, da ñacaja quini xihín xitoho

(Mt. 21:33-46; Lc. 20:9-19)

¹ Anda já ñacasáhá Jesús sácú a quiahva nuú ñayivi já ñacachi a já xihin ná:

—Ñasahin in dataa najánde cuaha dá tó uva nu ñúhu dá ta já ñasacu da in corra yito nu do. Ta ñacavaha da in nuú cuhní mé uva cán ña cavaha vino. Ta ñacavaha da in nu jíco canúu da já cuu candaa da tóco ndihi dó cán.

Tá ñandihí já nasahan ndojó da ñúhu dá nuú java na caja chúun na ña já ñaquee da cuahan xicá da.

² Ta tá ñaxinu tiempo jáquee na já nachindahá da in mozo da nuú ña cája chúun ñúhu da cán ña ná ndiquiahva na ña cáni nu dá ndiquehe da saha ñúhu da ña nasahan ndojó da nuú ña cán.

³ Joo mé ña cája chúun tóo ñúhu cán ñatiin na mozo da cán já ñacani na da. Tá ñandihí já ñanducú ñehe na da nuú xitoho da joo coó ñaha ná sahan ña nu dá.

⁴ Anda já nachindahá tucu mé da xihín ñaha ñúhu cán inga mozo. Joo da yóho ñacaja xíxi tucu na xihín dá jáchi ñacani na da xihín yuu.

Ta najándicuehe na jini dá já nacasáhá cána há na xihin dá.

⁵ Ta mé da xihin ñaha ñúhu cán natchindahá tucu da inga mozo da ta nasahní na da. Ta natchindahá cuahá ga da mozo da nasahan cán. Ta java da nacani na ta java da nasahní na.

⁶ Nacandoo in túhún jahyi mé da xihin ñaha ñúhu cán ta quíhvi ndivaha ini da jahyi da. Joo tá nu ndíhí já natchindahá da jahyi da jáchi cáhán da: “Cája i cuéntá coo toní ñúhú na xihin jahyí i”, naca hán da.

⁷ Joo mé na cája chúun ñúhu cán nacasáhá ndítúhún xihin táhan na já cáhí na já: “Candehé ndo. Yóho vaxi da cúu jahyi xitoho í. Ta tá ná xinu quiví quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí”, nacachi xihin táhan na cán.

⁸ Anda já natiin na da cán ta nasahní na da já najácana na yiquí cuñu da jata cútu cán –nacachi Jesús.

⁹ Anda já nandaca tuhún Jesús ñayivi ndúu cán já cáhí a já:

—Á co xini ndó ndía caja da xihin ñaha ñúhu yóho viti. Ña caja da quea quixi da ta cahní ndihi da na cája chúun too nu ñúhu dá. Já ndiquiahva da ñúhu dá nuú java ga na já ná caja chúun na nu á.

¹⁰ Á co xini ndó ña cáhí tuhun Ndióxi. Ña cáhí a quea:

Mé yuu ña najácana da cávaha vehe,
ñá cán cúu ña nanduu yuu ndúhu sahá vehe ña ín
chága saha.

11 Ña yóho quéa ñacaja Ndióxi ta cúu á in ñaha cáhnu ndivaha nu yo, cáchi tuhun Ndióxi —ñacachi Jesús.

12 Anda já ñacasáhá ndúcú na sacuaḥa tiin na Jesús chicaan na a vecaa jáchi ñacandaa ini na ña saḥa mé ná ñasacu a quiahva yóho. Joo saḥá ña yíhvi na ñayivi najándacoo na a ta ñaquee na cuahān na.

Ndáca tuhún na Jesús á ndítahan nu ná cháḥvi na jjuhún cuéntá impuesto

(Mt. 22:15-22; Lc. 20:20-26)

13 Tá nandihí já ñachindahá na java na fariseo xihín na cúu cuéntá Herodes nu Jesús ña ná coto ndojó ñahá na xihín tuhun cáḥan mé á já ná chicaan na cuachi jatá.

14 Anda já ñaxinu na nu Jesús já cáchi na já xihín á:

—Maestro, xini nde ña ndinuhu ña ndaa cáḥan mé ndó. Ta cō quéhe ndó cuéntá tá cáḥan núu ñayivi saḥa ndō. Ta cándaā ini nde ña tá cáḥan ndó saḥá in ñaha cája ñayivi cúu á saḥá ña sándeḥé ndó janda ínimā ná. Ta cándaā ini nde ña jánaḥa ndó ña ndaa saḥa íchi cuéntá Ndióxi. Ta viti cúni nde ndaca tuhún nde ndohó á ndítahan nuú nde cháḥvi nde jjuhún cuéntá impuesto nuú dā cómi cuéntá saḥa yo ñuu Roma. Á cháḥvi nde ña, á a cháḥvi toho nde ña —ñacachi na.

15 Joo sa ñacandaā ini Jesús ña cō cúu ná tá quiahva ndaa na ña cán quéa ñacachi a já xihín ná:

—Cándaā cáxi táhyí ini i ña cúni ndó coto ndojó cuití ndó yeḥe. Jánaḥa ndó in táhan jjuhún jan nuú i ná candehé e ña —ñacachi a.

16 Já nasahan na mé jiuhún cán nu á ta tá naxini a ña já nacachi a já xihín ná:

—Yo nahná ta yo quívi quéa ndáa nu á.

Já nacachi na cán já xihín á:

—Ñéhe a quívi xihín nahná da cómi cuénta saha yó ñuu Roma —nacachi na xihín á.

17 Anda já nacachi Jesús já xihín ná:

—Ndiquiahva ndó ñaha da cómi cuénta saha ndó ñuu Roma jan nu dá. Ta ndiquiahva ndó nu Ndióxi ña cúu ñaha mé á —nacachi a.

Chí nacatóntó mé na cán sahá ña nacachi Jesús xihín ná.

Ndáca tühún na saduceo Jesús á mé a ndaa nditacu ndii

(Mt. 22:23-33; Lc. 20:27-40)

18 Anda já nasahan java na saduceo cahan na xihín Jesús. Ta mé na saduceo yóho co cándusa na ña ndítacu tucu na sa naxihí. Sahá ña cán quéa nandaca tühún na Jesús já cáchí na já xihín á:

19 —Maestro, nu ley nacahyí Moisés sanahá natahnda chuun ta cáchí a já: “Tá tándaha in dataa xihín ñájíhí da ta tá coo jahyi ña cácu xihín dá ta tá ná xinu quívi quívi da cán já quéa cáchí ley Moisés ña ndítahan tándaha tucu ñájíhí da xihín da cúu ñani mé ndii cán já ná coo jahyi da cán xihín yuhú nuú ñani da”, já cáchí ley Moisés.

20 Ta viti cuni joho ndó ná cacu nde in quiahva nu ndó. Nasahíin usa ñani ta da nu cuíti natandaha dá xihín in ñáñáha. Tá nandihi naxihí da joo coo jahyi da ná cacu xihín ñá cán.

21 Ta natandaha ñani da, da chí ivi xihín ñá cuáan cán. Ta ja naxihí ri da cán va ta ni da yóho

coó ñacacu jahyi xihin ñájíhí ñani. Ta quiahva já nandoho ri ñani da, ña chí uní.

²² Anda quiahva ñaxinu ndíhusa ña ñatandaha xihin ña ta ni in da coó ñacacu jahyi xihin ña. Tá nu ndíhí ñaxihí ri mé va ñá.

²³ Ta viti ndáca tuhún nde ndohó ndá ña cacuu ndusa yí ña cán tá ná xinu quiví nditacu tucu ndii jáchi ndíhusa va ñani ña cán ñatandaha xihin ña — ñacachi na.

²⁴ Anda já nanducú ñehe Jesús tuhun nu ná já cáhí a já xihin ná:

—A váha toho cáhvi ini ndó jáchi co xini ndó ndaja cáhan tuhun Ndióxi ta ni co xini ndó ndá quiahva cáhnu cúú ndé Ndióxi.

²⁵ Jáchi tá ná nditacu tucu ndii a tandaha ga na ta ni a quiahva na jahyi jíhí ña tandaha ná. Cacuu na tátuhun táto Ndióxi ndúu indiví ta co tandahá na cán.

²⁶ Joo sa xini yo ña nditacu tucu ndii. Á a ñaha cahvi ndó ña ñacahyí Moisés sahá ña ñacahan Ndióxi xihin dá tañu tohíñú, dó cándaha ñúhu cán. Já ñacachi a já xihin dá: “Yehe cúú Ndióxi cája cáhnu Abraham ta yehe cúú Ndióxi cája cáhnu Isaac ta yehe cúú Ndióxi cája cáhnu Jacob”, ñacachi a.

²⁷ Ta ña yóho cúní cachi a ña tácu yí va Abraham xihín Isaac xihín Jacob vatí sa ñaxihí yiquí cuñu na. Sahá ña cán quéa co xini ndó ndá saha cáhan ndo —ñacachi a.

Tá cáhan Jesús ndia cúú ña cáhnu chaga sáhdá Ndióxi caji í

(Mt. 22:34-40)

²⁸ Ta ndaja coo in ña ñanaha ley Moisés ñacayati da nu Jesús jáchi sa ñaxini johó da ña ñacahan

Jesús xihín ña ndúu cán. Sahá ña xini da ña nanducú ñehe ndaa Jesús tuhun nuú ña cán sahá ña cán quéa nandaça tuhún da Jesús já cáchí da já xihín á:

—Ndía cúu ña cáhnu chága sáhndá Ndióxi caja í — ñacachi da.

²⁹ Já ñacachi Jesús já xihín dá:

—Ña cáhnu chága cúu ña cáchí tuhun Ndióxi yóho: “Taa johó ndó, ña Israel. Ín in túhún jiní Ndióxi ta mé á cúu xitoho í.

³⁰ Ta ndítahan quihvi ini ndó mé Ndióxi, xitoho ndó xihín tóco ndihi ínimá ndo ta xihín ndinuhu ini ndó. Ta quihvi ini ndó a xihín tóco ndihi xini túni ndo ta xihín tóco ndihi ndée ndo.” Ña yóho cúu ña nu cuití sáhndá Ndióxi caja ndó.

³¹ Tá cuni coo ña nu cuití já cuni coo ri ña chí ivi va ta cáchí a: “Quihvi ini ndó ñani táhan ndó tá quiahva quihvi ini ndó mé ndó.” Coó ga inga ña sáhndá Ndióxi caja ndó cacuu ña cáhnu chága nuú ña yóho — ñacachi a.

³² Anda já ñacachi mé da jánaha ley Moisés cán xihín Jesús:

—Vaha chá ñacahan ndó, Maestro. Mé a ndaa quéa ñacahan ndo ña ín in táláá cuití Ndióxi ta coó inga ga Ndióxi.

³³ Ta ndítahan quihvi iní mé á xihín tóco ndihi ínimá yo ta xihín ndinuhu iní ta xihín tóco ndihi xini túni yo ta xihín tóco ndihi ndée yo. Ta ndítahan quihvi iní ñani táhan í tá quiahva quihvi iní mí. Ndíyahvi chága ña yóho a juú ga tóco ndihi ñaha jóco ña nu Ndióxi ta ndíyahvi chága ña a juú ga ñaha chícaan ñúhu ná nu náa — ñacachi da.

34 Tá naxini Jesús ña nanducú ñehe vaha da cán tuhun nu á já cáchí a já xihín dá:

—Jalóho cúní ña cacomí Ndióxi cuéntá sahun — nacachi Jesús.

Tá nandihi cán ni in ga na coó nasahan ndeé ini na ndaca tuhún ga na mé á.

Ndáca tuhún na Jesús ndáchí naquixi a

(Mt. 22:41-46; Lc. 20:41-44)

35 Ndácaan Jesús veñuhu cáhnu jánaḥa nuú ñayivi já cáchí a já xihín ná:

—Ndávaha cáchí na jánaḥa ley Moisés ña vaxi Cristo chichi David.

36 Ta sa mé David tá nachutú ndaa ini da xihín ínimá yíi Ndióxi já nacachi da já:

Já nacachi Ndióxi xihín xitoho i:

“Cacoo xoo cuáha i yóho,

anda quiahva ná caja i ña ná cacomún cuéntá sahá na co cúní yohó”, nacachi Ndióxi sanahá.

37 Ndávaha cáchí na ña vaxi Cristo chichi David joo mé tiempo cán nacachi David ña cúú á xitoho da —nacachi Jesús.

Ta cuaha ndivaha ñayivi cájii íni na táa johoh na nu cáhan Jesús.

Chícaan Jesús cuachi jatá na jánaḥa ley Moisés

(Mt. 23:1-36; Lc. 11:37-54; 20:45-47)

38 Tá jánaḥa Jesús na já cáchí a já xihín ná:

—Cuéntá coo ndó xihín na jánaḥa ley Moisés jáchi cátóo na cándixi na jáhma nání caca nuu na. Ta cátóo na cahan toní ñúhú ndivaha ñayivi xihín ná tá xíca nuu na nuú yahvi.

39 Ta tá cuahan na veñuhu cátóo na cacoo na nu sácoo na íin chága saha. Ta tá cuahan na víco nuú

va_ha cá_toó ná coo na. Cuéntá coo ndó xihín na yóho.

⁴⁰ Jáchi cá_ndaa na vehe najihí cuáan ta tá nandihí cuahá ndivaha xíca tahví na nu Ndióxi jáchi cúni na jájahvi na nuú ña núu cája na. Mé a ndaa ná cahan i xihín ndo ña mé na jánahá ley Moisés yóho cacuu na na ndoho chága ini caja Ndióxi —cáchi Jesús.

*Ña najoco in ña cuáan ndáhví
(Lc. 21:1-4)*

⁴¹ In tañu ín coo Jesús ini veñuhu cáhnu cán yati nu ín sató nu táán na jjuhún jóco na nu Ndióxi. Ta sándehe a ndá quiahva táán ñayivi jjuhún ini mé sató cán. Ta naxini a cuahá ta cuicá xínu coo táán cuahá na jjuhún ini mé sató cán.

⁴² Ta mé já naxinu coo in ña cuáan ndáhví ta nataán ña ivi jjuhún ña núu yahvi ini mé sató cán.

⁴³ Já nacana Jesús na xíca tuun xihín á ta já cáchi a já xihín ná:

—Mé a ndaa ná cahan i xihín ndo ña cuaha chága jjuhún nasahan ña cuáan ndáhví yóho a juú ga tóco ndihí java ga na cán.

⁴⁴ Jáchi tóco ndihí na cán nasahan na ña yójó nu ná joo ña cuáan ndáhví yóho nasahan ña nu Ndióxi tóco ndihí ña cómi ña catacu ña —nacachi a xihín ná.

13

*Cáxi tuhun Jesús nu ná ña vaxi quivi ndihí sahá veñuhu cáhnu ñuu Jerusalén
(Mt. 24:1-2; Lc. 21:5-6)*

¹ Tá naquee Jesús veñuhu cáhnu cán já nacachi in da xíca tuun xihín a cán já:

—Maestro, candehé ndó ndaja náhnu yuu nacavaha na veñuhu yóho ta ndaja jícó ndivaha nacavaha na ña —nacachi da.

² Anda já nacachi Jesús já xihín dá:

—Mé a ndaa náhnu a joo ndá chuun cúú á jáchi ni janda in yuu yóho a cándoo jatá inga yuu jáchi vaxi quivi tá nditani ndihi ña yóho —nacachi a.

Ndicani Jesús ña coo tá ná cayati quivi ndihi saha ñuyívi

(Mt. 24:3-28; Lc. 21:7-24; 17:22-24)

³ Anda já nasahan na cán yucu yíto Olivo, ña xíto ndaa táhan xihín veñuhu cáhnu cán. Ta tá ín coo Jesús cán já naxinu Pedro xihín Jacobo xihín Juan xihín Andrés já nacahan jehé na xihín á já cáhí na já:

⁴ —Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá sa nacayati mé quivi cán —nacachi na.

⁵ Já nacachi Jesús já xihín ná:

—Cuéntá coo ndó ta a quiahva ndó ñamaní jándahvi ni in ñayivi ndohó.

⁶ Jáchi cuahá ndivaha na quixi na cuéntá mí i ta cahan na ña tuhún tá cachi na já xihín ndó: “Yehe cúú Cristo, da nachindahá Ndióxi cacomí cuéntá sahá ñayivi.” Ta xihín ña yóho cuahá ndivaha ñayivi jándahvi na.

⁷ Joo tá nacasahá xini joho ndó ña yóho cáa cúu tondohó, a cáyihví toho ndó jáchi quiahva já ndítahan coo. Joo camaní yíi xinu coo quivi nu ndíhí.

⁸ Jáchi ñayivi ndúu in nación ndicuítá na caní táhan na xihín na ndúu inga nación ta caní táhan na in ñuu xihín na inga ñuu. Ta quixi nditáán ndijáá

nu ndúu ñayivi já xinu tama ndeé ta já casáhá na ndivaa na. Ta tóco ndihi ña yóho cúu á tá cava sáhá sahá ña núu vaxi nuú ñayivi jáchi cámanj xinu coo chága nuú ndoho ini na.

⁹Joo candaa vaha ndó mé ndó jáchi ndiquiahva na ndohó ndahá na cómi chuun ta cani na ndohó ini veñuhu. Ta sahá yehe cañehe na ndohó nuú na cómi cuéntá sahá ñayivi xihín nuú na cúu jutixia ta já cuu cahan ndó sahá j nuú na cán.

¹⁰Joo jihna ñúhú xíní ñúhú ndicuïta nuu tuhun vaha saha mí j nu tóco ndihi ñayivi anda jáví ndihi saha ñuyíví yóho.

¹¹Ta tá ná cañehe na ndohó cuhun ndó nuú na jutixia, a ndícani ini ndó sahá ndá tuhun cahan ndó xihín ná. Mé hora já cahan ndó ña quiahva Ndióxi nu ndó cahan ndo. Jáchi a juú jiní mé ndó quixi ña cahan ndo. Ínima yíi Ndióxi cacuu ña quiahva tóco ndihi ña cahan ndo.

¹²Ta java ta jicó túhún da ñani da ta java da jicó túhún da jahyi da ña ná cahní ñahá na. Ta cuaha ná ndicuïta na cani táhan na xihín tátá na ta cahní ñahá na.

¹³Ta ndaja táhan ñayivi ndúu ñuyíví yóho candají na ndohó sahá yehe. Joo ndá na ná candico tuun íchi mí j janda ná xinu quíví quivi na, na jan cacuu na cacu ndaa ínima.

¹⁴Na cáhvi tutu ná candaa ini na ña cáhan. Daniel cúu da nacahyí sanahá sahá in ña quini ña játiví ñahá. Tá ná cuni ndó ña cándichi in a nuú co ndítahan coo a já ndítahan nuú na ndúu estado Judea cunu na cuhun na chí yucu.

¹⁵Ta ndá na cánúu jiní véhe mé quíví já co ndítahan nuu na tavá na ñaha vehe na.

16 Ta ndá na ndúu yúcu co ndítahan ndicó coo na vehe na ndiquehe na jáhma ná.

17 Ndáhví najihí, mé na ñúhu jahyi mé quivi já. Ta ndáhví na ñéhe ndaa na valí táhan ña chíchí yii.

18 Caca tahví ndo nu Ndióxi ña ná a cácuu a tiempo vixi tá ná cunu ndó cuhun ndo já ná a ndóho chága ini ndó.

19 Jáchi quivi ndoho ndivaha ini ndó cacuu a cán. Jáchi janda tá nacava sáhá saha ñuyivi coo nandoho ini na tá quiahva ndoho ini na mé quivi jan. Ta tá ná yaha ña jan, a ndicó coo ga ña ndoho ini na quiahva já.

20 Ta tá ná a ndája cuítí Ndióxi tiempo yóho ni in ñayivi a cúu cacu ndaa. Joo nasacu ini a ndaja cuítí a mé tiempo yóho jáchi quíhvi ini a tóco ndihi na nacaxi mé á.

21 "Ta tá ná cachi in na xihin ndó: "Candehé ndo, yóho íin Cristo, da nachindahá Ndióxi cacomí cuéntá sahá ñayivi", á tá ná cachi na: "Candehé ndo, cáa íin da", cachi na já queá a cándúsa toho ndó na.

22 Jáchi quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na cahan na cuéntá Ndióxi ta jári caja na cuahá nuú ña náhnu xihin ña xituhún ña ná jándahvi na ñayivi. Ta anda na sa nacaxi Ndióxi jándahvi na tá ná cuu caja na ña.

23 Xíni ñuhú candehé vaha ndó mé ndó jáchi sa nacaxi tuhun yachí ndihí i ña yóho xihin ndo — nacachi Jesús.

*Ndaja coo tá ná xinu coo quivi quixi tucu Jesús
(Mt. 24:29-35,42,44; Lc. 21:25-36)*

24 Já cáchí tucu Jesús já:

—Joo tá sa nayaha tóco ndihi ña nandoho ini ñayivi já canaá nuú candii ta a ndíyehē ga yoo.

25 Anda indiví quee quimi cuyu rí nu ñúhu ta quiji nuu indiví ña nacavaha Ndióxi.

26 Anda já cuni na yehē quixi i tañu vico xihin tóco ndihi ndéē cáhnu i, da nachindahá Ndióxi nduu ñayivi. Ta cuni na ndá quiahva cáhnu cúu yehē.

27 Ta tá nandihí já chindahá i táto mí i ña ná jánditaca na na sa nacaxi i tañu tóco ndihi ñuu janda ní cúu sahá ñuyíví ta janda ní cúu sahá indiví.

28 Catiahva ndó ña cúni cachi mé quiahva sácú u nu ndó sahá titó ñuhú. Tá yúta ndáha dó cán ta vaxi núma válí do já candaa ini ndó ña vaxi tiempo ihní.

29 Ta quiahva já cacuu ña yóho tá ná cuni ndó yaha tóco ndihi ña yóho. Jáchi anda jáví candaa ini ndó ña nacayati tiempo quixi tucu yehē ñuyíví yóho.

30 Mé a ndaa ná cahan i xihin ndó ña yaha tá yaha tóco ndihi ña nacachi i xihin ndo ta anda jáví quivi na ndúu tiempo viti.

31 Ta ndihi sahá indiví xihin ñuyíví joo a ndíhi toho sahá tuhun nacahan i xihin ndó yóho. Jáchi coo tá coo va ña.

32 Joo ni in túhún toho ñayivi co xini na ndá quivi á ndá hora yaha ña yóho. Ta ni mé táto Ndióxi ndúu indiví co xini na ndá quivi coo ña yóho. Ta ni yehē, da cúu in túhún jini já jahyi Ndióxi co xini ndá quivi coo ña yóho. In túhún Ndióxi, tátá yo quea xini a.

³³ Sahá ña cán quéa cañuhu ini ndó sahá ña yóho. Coo tiahva ndó ta caca tahví ndo nu Ndióxi jáchi co xini ndó ndá quiví xinu coo ña yóho.

³⁴ Jáchi ña yóho cúú á tátuhun in dataa quéta cuahan xicá joo tá cámaní quee da cuhun da jándacoo too da vehe da nu mozo da ña ná candaa na ña. Ta sahan da chuun caja in in mozo da. Ta nuú da ndáá yéhe nasahnda da chuun ña ná candaa vaha da ña.

³⁵ Sahá ña cán quéa xini ñuhú coo tiahva ndó jáchi co xini ndo ndá quiví xinu coo mé da cúú xitoho vehe. Co xini ndo á cacuu a tá nacuaá too á cacuu a java ñuú táji á cacuu a tá nacana chéle á cacuu a tá sa nativi.

³⁶ Cuéntá coo ndó. A juú tiahva náá xinu coo da ta ndiñehe dá ndohó nduu ndó quiji ndo.

³⁷ Ña cáhan i xihin ndó cáhan i xihin ndihi na: Xini ñuhú coo tiahva ndó saha mé quiví quixi tucu u —nacachi Jesús.

14

Nditúhún jehé na tiin na Jesús

(Mt. 26:1-5; Lc. 22:1-2; Jn. 11:45-53)

¹ Tá cámaní ivi quivi caja na vicó pascua xihin víco tá xixi na pan ña co quée yusá naxaa xihin já nacasahá na sacuahá nuú jutú xihin na jánahá ley Moisés ndúcú na ndá quiahva caja na tiin jehé na Jesús já cuu cahní na a.

² Ta já cáchí xihin táhan na:

—A tীন toho í da mé víco jáchi tiahva náá ndivaa ñayivi —nacachi na.

*Tá nachojo in ñáñáha perfume jini Jesús
(Mt. 26:6-13; Jn. 12:1-8)*

³ Ta ndaja coo íin Jesús ñuu Betania vehe Simón, da cáhan na xihin: ta nandoho cuehe táhyi. Ta nani ndúu coo na nu mesa cán naxinu in ñáñáha ta ñéhe ñá in yúyú alabastro nachutú jini a xihin perfume, dó támi ndivaha sáhan ta cúu dó perfume yahvi ndivaha. Ta natahvi ñá yóho mé yúyú cán já nachojó ña do jini Jesús.

⁴ Ta java na ndúu cán ñacasáha na jáa ná xihin ña já ñacasáha cáchi xihin táhan na já:

—Ndávaha nativi uun perfume yóho.

⁵ Cuu jicó yó do, nduu ta yáha ga nuú uni ciento denario quehé saha dó ta xihin jiuhún cán cuu chindeé yó na ndahvi, nduu —cáchi na.

Sahá ña cán quéa naxojo ini na xihin ñáñáha cán ta ñachan núu na saha ña.

⁶ Anda já ñacachi Jesús já xihin ná:

—A cáhan ndó xihin ña. A jáquihvi ndó ña. Ña vaha quéa ñacaja ñá yóho xihin i.

⁷ Jáchi na ndahvi ní tiempo canduu na tañu ndó ta cuu caja ndó ña vaha xihin ná ndá tañu cúni mé va ndó joo yehe a cóo tuun toho i xihin ndo.

⁸ Mé ñá yóho ñacaja ñá janda nuú naxinu ndée ñá caja ñá xihin i. Sa najándicuchu yachi va ñá yóho yiquí cuñu i xihin perfume, dó támi sáhan jan ña ná coo tiahva vi tá ná casa quivi nduxu.

⁹ Mé a ndaa ná çahan i xihin ndo ní cúu ñuyivi nuú caca nuu ñayivi çahan na tuhun vaha saha mí i já quéa ndicani na ña ñacaja ñá yóho xihin i já ndicuhun ini na saha ña —ñacachi a.

*Jícó túhún Judas Jesús
(Mt. 26:14-16; Lc. 22:3-6)*

¹⁰ Ta ndaja coo in táhan da uxu ivi xíca tuun xihín Jesús, da naní Judas Iscariote nasahan da cahan da xihín na sacuahá nuú jutu. Já nasahan da tuhun da nuú na cán ña ndiquiahva da Jesús ndáha ná.

¹¹ Tá naxini johó na cán ña nacachi da xihín ná nacavatá na ta nasahan na tuhun na nu mé Judas ña quiahva na jiuhún nu dá. Ta sa mé nani já nacasahá Judas ndúcú da ndaja cuu caja da ndiquiahva da Jesús nu ná.

*Tá naxijini ndayí Jesús xihín na xíca tuun xihín á
(Mt. 26:17-29; Lc. 22:7-23; Jn. 13:21-30; 1 Co 11:23-26)*

¹² Mé quiví nuú vicó pascua tá xíxi na pan ña cō queé yusá naxaa xihín já sáhní na ndicachi válí jócō na nu Ndióxi. Já nandaca tuhún na xíca tuun xihín Jesús mé á já cáchí na já xihín á:

—Ndáchí cúní ndó cuhun nde caja ndíví nde cajíni ndó vicó pascua —nacachi na.

¹³ Anda já nachindahá Jesús ivi da xíca tuun xihín á já cáchí a já xihín dá:

—Cuáhán ndó ñuu jan jáchí jan ndiñehe ndó in dataa ñehe da in yoo ticuifí ta candicō ndó da cuhun ndo.

¹⁴ Tá ná xinu da vehe nuú ndihvi da já cachi ndó xihín da cúu xitoho vehe cán já: “Da jánahe ndehe cáchí xuhun: Ndáchí ín nuú coo i cajíni i vicó pascua xihín na xíca tuun xihín i.”

¹⁵ Anda já jánahe mé da cán in cuarto cáhnu ña cánúu jini véhe piso ninu. Sa ín tiahva va ña. Cán caja ndíví ndo ña cajíni —nacachi Jesús xihín ná.

16 Já na_quee mé na xíca tuun xih_in Jesús cán cuah_an na ta tá na_xinu na ñuu cán na_sah_in tá ín cáh_i Jesús xih_in ná. Já na_caja ndív_i na ña caj_ini na vicó pascua mé cán.

17 Tá na_cuaá na_xinu Jesús xih_in ndíhu_{xu} ivi na xíca tuun xih_in á.

18 Ta tá ndúu coo na nu mesa xíxi na já na_cachi Jesús já xih_in ná:

—Mé a nda_a ná ca_ha_n i xih_in ndo ña in táhan ndó, da ndúu coo xíxi xih_in i nu mesa yóho cacuu da jicó túhún ye_he —na_cachi a.

19 Anda já na_casáhá na cán cácué_ha ini na já na_casáhá tá in tá in na ndáca túhún na mé á já cáh_i na já xih_in á:

—Á ye_he cacuu da jicó túhún mé ndó.

Já na_cachi inga tucu da já:

—Á a juú ye_he cacuu da.

20 Anda já na_cachi Jesús já:

—In táhan ndó da cúu uxu ivi, da in ndúu xíxi xih_in i ini cohó i, da cán cúu da jicó túhún ye_he.

21 Ye_he cúu da na_cindahá Ndióxi nduu ñayivi ta ndítahan nuú i quivi i tá ín cáh_i túhun Ndióxi. Joo ndáhvi nahá na_cuu da jicó túhún ye_he. Janda vaha chága ná a cácu da, nduu —na_cachi a.

22 Nani xíxi na ndúu na na_tiin Jesús pan já nandiquiahva ndixahvi nu Ndióxi. Tá nandihi na_sahnda java ña ta na_sahan ña nu ná já cáh_i a já xih_in ná:

—Júhun ndó jáchi ña yóho cúu tátuhun yiquí cuñu i —na_cachi a.

23 Tá nandihí natiin a in vaso nu ñúhu tó uva já nandiquiahva ndixahvi nu Ndióxi. Ta nasahan mé á do nuú na cán ta tá in tá in na naxihi na do.

24 Já nacachi a já xihin ná:

—Dó yóho cúú dó tátuhun ní i, dó cuíta sahá cuahá ñayivi. Tá ná cuíta ní i já candaa ini ndó ña najáxinu coo Ndióxi tuhun a nasahan sanahá.

25 Mé a ndaa ná cahan i xihin ndo ña a cóho ga i tó uva janda quiahva ná xinu coo quiví coho tucu u inga dó vaha chága tá ná xinu quiví cacomí Ndióxi cuénta sahá ñayivi —nacachi a.

Cáxi tuhun Jesús ña chijehé tuhun Pedro ña xini da mé á

(Mt. 26:30-35; Lc. 22:31-34; Jn. 13:36-38)

26 Tá nandihí naxita na in canto já naquee na cuahan na yucu yitó Olivo.

27 Anda já nacachi Jesús já xihin ná:

—Tóco ndihí ndó jándacoo ndó yehe ñuú viti jáchi já cáchi tuhun Ndióxi já: “Cahní i da ndaa ndicachi ta xihín ña yóho ndicuíta nuu ndicachi jana dá cuhun ri”, cáchi tuhun Ndióxi.

28 Joo tá nandihí nditacu tucu u ta já cuhun jihna ñúhú yehe estado Galilea anda já cuhun mé ndó —nacachi a.

29 Anda já nacachi Pedro já xihin Jesús:

—Vatí ná jándacoo ndihí na mé ndó joo a jándacoo toho i ndohó —nacachi da.

30 Anda já nacachi Jesús já xihin dá:

—Mé a ndaa ná cahan i xuhun mé ñuú viti tá cámaní cana ivi chéle já chijehé tuhún ña xínún yehe uní tañu —nacachi a.

31 Já naçasáhá ndúcu ndéé Pedro cáhan da já cáchí da já:

—Vatí ná quivi i xihin ndo joo a chíjehé tuhun toho i sahá ña xini i mé ndó —naçachi da.

Ta mé quiahva já naçachi ndihi na cán xihin á.

Tá xica tahví Jesús tañu yitó olivo nani a Getsemani

(Mt. 26:36-46; Lc. 22:39-46)

32 Anda já naxinu na cán in nuú nani Getsemani já naçachi Jesús já xihin na xica tuun xihin á:

—Yóho cacoo ndó nani ná cuhun i cáa caça tahví i nu Ndióxi —naçachi a.

33 Ta ndáca Pedro xihin Jacobo xihin Juan cuahan xihin á. Ta ndaja coo naçasáhá cácuéha ini a ta a juú quiahva táhvi ini a.

34 Já naçachi a já xihin ná:

—Cácuéha ndivaha ini i chí quivi i cúu ini i. Yóho candoo too ndó ta coto a cúju ndo —naçachi a.

35 Anda já naquee Jesús cuahan chága chí nuu já naçaxití a janda quiahva naxinu coo nuu á nu ñúhu cán. Já naxica tahví a nu Ndióxi ña ná caja mé á ña ná a ndóho a tá quiahva vaxi nu á ndoho a chí nuu.

36 Já cáchí a já xica tahví a nu Ndióxi:

—Tátá Ndióxi, tóco ndihi ñaha cuu caja ndó. Chindeé ndó yehe ná a ndóho i ña ihvi ndivaha ña vaxi nuú i ndoho i. Joo ná coo tá lin cuni mé ndó ta ná a cóo toho ña cuni yehe —naçachi a.

37 Anda já nandicó coo a nu ndúu na xica tuun xihin á cán ta já nandiñehe á na quíji na ndúu na. Já naçasáhá cáchí a já xihin Pedro:

—Á quiji vún, Simón. Á coó naucu canditún ni in hora.

³⁸ Xíni ñuhú coo tiahva ndó ta caca tahví ndo nu Ndióxi já ná a cóto ndojó rí quini ndohó. Mé a ndaa ínima ñayivi cúni a ndinducú a Ndióxi joo yiquí cuñu na co ín tiahva caja ña cúni Ndióxi — nacachi a.

³⁹ Anda já naquee tucu a cuahan caca tahví a nu Ndióxi. Ta sa mé tuhun nacahan nu cuítí cán nacahan tucu a chí ivi.

⁴⁰ Ta tá nandicó coo a nandiñehe tucu a na xíca tuun xihin á cán ndúu na quiji na jáchi naquehe a mahnú na. Ta chí co xíni na ndá tuhun nducú ñehe na nu Jesús sahá ña quiji na.

⁴¹ Tá nandicó coo a táhndá uni já nacachi a já xihin ná:

—Vatí cúni ndó cuju ndo ta vatí cúni ndó ndiquehe ndée ndo joo a cúu caja ndó ña viti. Jáchi sa naxinu coo hora ndiquiahva na yehe, da nachindahá Ndióxi nduu ñayivi ndahá ñayivi cája cuachi.

⁴² Cuáhán ndacoo ndó ná coho. Jáchi sa vaxi da jícó túhún yehe —nacachi a.

Tá natiin na Jesús

(Mt. 26:47-56; Lc. 22:47-53; Jn. 18:2-11)

⁴³ Ta nani cahan yii va Jesús cándichi a já naxinu Judas, da cúu in táhan da uxu ivi xíca tuun xihin Jesús cán. Ta xihin mé da cán vaxi cuahá ñayivi ñehe na machiti xihin yító viti. Mé na vaxi cán cúu ná na vaxi cuénta na sacuahá nuú jutú xihin nuú na jánahá ley Moisés xihin nuú na sacuahá veñuhu.

44 Ta mé Judas, da ndiquiahva mé á nuú na cán sa naꝓandoo da xihín na cán ña tatí yúhu dá sajóho Jesús jáchi naꝓachi da já xihín ná:

—Mé da ná tatí yuhú u sajóho, da cán cúú dá tiin ndó ta cató tuun ndó da cañehe ndó cuhun ndo — naꝓachi da.

45 Ta tá naꝓinu da cán chí ivi laá naꝓayati da nu Jesús já cáchi da já xihín á:

—Maestro, maestro.

Já naꝓatí yúhu dá sajóho a.

46 Anda já naꝓiin tuun na Jesús.

47 Joo in táhan da xíca tuun xihín Jesús cán naꝓavá da machiti da já naꝓhitúhun dá in johó da cúú mozo da saꝓaaha nuú juꝓu cán.

48 Anda já naꝓachi Jesús já xihín na naꝓinu tiin ñahá cán:

—Cája ndó xihín i tátuhun cája na xihín taꝓa cuíhna jáchi naꝓqueta ndó vaꝓi ndó tiin ndó yehe xihín machiti ta xihín yíto.

49 Ndijáá ní quivi naꝓahin i tañu ndó jan ta najánaaha i ndohó ini veñuhu cáhnu ta ni in tañu coó naꝓiin ndó yehe. Joo tóco ndihi ña yáha yóho xíní ñúhú yaaha ña já ná xinu coo nuú ña naꝓahyi sahá i ini tuhun Ndióxi —naꝓachi a.

50 Anda já naꝓinu ndihi na xíca tuun xihín Jesús cán cuahan na ta najándacoo na mé á.

Tá naꝓinu in datacú cuahan da

51 Joo in datacú catíví da in túhún jiní sávana ndíco da jatá na cán cuahan da ta naꝓiin na da.

52 Joo najaní da mé dá ta naꝓandoo sávana da já naꝓinu lahla da cuahan da.

*Nasacu na Jesús nuú nataca ndihi na sacuahā
(Mt. 26:57-68; Lc. 22:54-55, 63-71; Jn. 18:12-14,
19-24)*

⁵³ Anda já nasañehe na Jesús nasahan na nuú da cúu sacuahā chága nu ndíhi jutū. Ta nandique táhan tóco ndihi na sacuahā nuú jutū xihín na sacuahā veñuhu xihín na jánaḥā ley Moisés.

⁵⁴ Ta nasandico xicá Pedro Jesús anda quiahva naxinu da yéhé vehe da cúu sacuahā chága nu ndíhi jutū cán. Já nasacoo da xihín da ndáá veñuhu cáhnu cán xítúní da yati yávi núhu cán.

⁵⁵ Ta na sacuahā nuú jutū xihín tóco ndihi na cómi cuéntá sahá na Israel nataca na cán ndúcú na cuachi jácana na jatá Jesús já cuu cahní ñahá na. Joo coo cuachi jíquí ná ñeḥe ná chínúu na jata mé á.

⁵⁶ Ta cuahā ná nacasáhá cáhan na ña tuhún saha Jesús joo co xínu tuhun cáhan na jáchi a cuú ndique táhan vaha tuhun na.

⁵⁷ Ta nandaca ndichi java da cáhan da tuhun jíquí saha Jesús já cáchí da já:

⁵⁸ —Naxini johó nde nacachi da jan já: “Jánditani i veñuhu cáhnu cán, ña nacavaha ñayivi ta tixi uní quiví jácandichi tucu u inga ga ña a cuú cavaha ndahá taa” —nacachi da.

⁵⁹ Joo ni já coo nacuu ndique táhan tuhun na xihín ña nacachi na cán.

⁶⁰ Anda já nandaca ndichi mé da cúu sacuahā chága nu ndíhi jutū tañu na cán já nandaca tuhún da Jesús já cáchí da já xihín á:

—Á chí a ndúcú ñehún tuhun nuú nde sahá cuachi jácojo na jatun —nacachi da.

61 Joo coó ñacahan Jesús ni in tuhun xihín ná já táji níi já va ñasahiin a. Mé ña cúú sacuaḥa chága nu ndíhi jutú cán ñacasáhá ndáca tuhún tucu ña a já cáchí ña já xihín á:

—Á jivi ndusa yóhó cúún Cristo, ña cúú in tuhún jini já jahyi Ndióxi yii, mé ña ñachindahá Ndióxi cacomí cuéntá sahá ñayivi —ñacachi ña.

62 Anda já ñacachi Jesús já:

—Ajan, jivi yehe cúú dá. Ta vaxi quivi tá cuni ndó yehe, ña ñachindahá Ndióxi nduu ñayivi cacao i xoo cuáha Ndióxi, mé a ín cuaha ndée. Ta já cuni ndó yehe ndicó coo i ñuyivi yóho tañu vico tá ná quixi i chí indivi —ñacachi a.

63 Anda já ñandatá ña cúú sacuaḥa chága nu ndíhi jutú jáhma ña ña ná candaa ini ñayivi ña xójo ini ña. Já cáchí ña já:

—Ndá chicuu chága yó ñayivi ndicani nu yo. Xihín ña ñacahan ña yóho candaa ini ña ndája núu ña Ndióxi.

64 Á sa ñaxini joho ndó ña ndája núu ña Ndióxi xihín tuhun ñacahan ña. Ndaja xini ndó caja i xihín dá viti —ñacachi ña.

Anda já ñandique táhan tuhun ndihi ñayivi ña ndácaan cuachi nu Jesús ña cán quéa ndítahan quivi a.

65 Java na ñacasáhá ña xihnu ndaa na tóji nu á ta java na ñachicaji na jáhma nu á já ñacasáhá cáni na jahnda nu á já ndáca tuhún ñahá ña já cáchí ña já xihín á:

—Cahan xihín nde yo ñacani yóhó viti —ñacachi ña.

Ta ñanda ña ndáa veñuhu cáhnu cán viti ñacasáhá cáni na jahnda nu á.

*Tá naxijehé tuhun Pedro ña xini da Jesús
(Mt. 26:69-75; Lc. 22:56-62; Jn. 18:15-18, 25-29)*

⁶⁶ Ta ndaja coo Pedro ín yí dá xítúní da cán já naxinu in ñá cája chúun xihín da cúu sacuaḥa chága nu ndíhi jutú.

⁶⁷ Já naxini ñá xítúní Pedro ta nahá vaha nasandehé ñá nu dá já cáchí ñá já:

—Yóhó cúun táhan da xíca tuun xihín Jesús, da ñuu Nazaret —naxachi ñá.

⁶⁸ Joo naxijehé tuhun da ña xini da Jesús já cáchí da já:

—Uhun. Co xini toho i da ta co xini toho yehe ndá saḥa cáhun —cáchí Pedro.

Anda já naxayati da yuyehé ta ivi laá nacana chéle.

⁶⁹ Tá naxini mé ñá cája chúun xihín da cúu sacuaḥa chága nu ndíhi jutú cán ña nasandichi too da yehé cán já nacasáhá ña cáxi tuhun ña xihín tóco ndíhi ñayivi ndúu cán já cáchí ñá já:

—Candehé ndó. Da cáa cúu in táhan da xíca tuun xihín Jesús —naxachi ñá.

⁷⁰ Naxachi tucu Pedro ña co xini da Jesús. Chá va nayaha ña yóho ta já naxachi na ndúu xítúní cán xihín Pedro:

—Táhan ri da cáa va cúu yóhó jáchi cúun da Galilea ta cáhun tátuhun cáhan na cán —naxachi na.

⁷¹ Anda já nacasáhá Pedro cánahá da ta natavá da quivi Ndióxi ña co xini da Jesús já naxachi da já:

—Ni co xini mí i ndá taa cúu da jan, da cáhan ndó sahá jan —naxachi da.

⁷² Tá naxachi da já ivi laá nacana chéle ña chí ivi. Anda já nandicuhun ini Pedro ña naxachi

Jesús xihín dá tá ñacachi a já: “Tá cámaní cana ivi chéle sa chíjehé tuhún ña xínún yehe uní tañu.” Tá ñandicuhun ini Pedro ña yóho já ñacasáhá sácu ndivaha da.

15

*Tá ñandiquiahva na Jesús ndáha Pilato
(Mt. 27:1-2, 11-14; Lc. 23:1-5; Jn. 18:28-38)*

¹ Tá ñativi inga quiví itaan já ñandique táhan na sacuahá nuú jutú xihín ña sacuahá veñuhu xihín ña jáñaha ley Moisés xihín ndihi ña cómi cuéntá sahá ña Israel. Já ñacató ña Jesús ñéhe na a cuahan ña já ñandiquiahva na mé á nu Pilato.

² Ta mé Pilato ñandaça tuhún da Jesús já cáchí da já xihín á:

—Á mé a ndaa cúun in rey, da cómi cuéntá sahá ña Israel.

—Ajan. Jivi cúu u tá quiahva cáchí ndo jan — ñacachi Jesús xihín dá.

³ Ta najácojo ña sacuahá nuú jutú cán cuahá cuachi jata Jesús.

⁴ Já ñandaça tuhún tucu Pilato Jesús já ñacachi da já xihín á:

—Ndávaha co ndúcú ñehún tuhun nuú i. Candehé ndaja cuahá nuú cuachi jácojo na jatun —ñacachi da.

⁵ Joo ni in tuhun coó ñacahan Jesús. Tá ñaxini Pilato ña co ndúcú ñehe Jesús tuhun já ñacatóntó da sahá ña cája.

*Sácu ini na saha Jesús ndaja caja na ña ná quivi a
(Mt. 27:15-31; Lc. 23:13-25; Jn. 18:38-19:16)*

6 Tañu mé víco pascua nasahjin costumbre Pilato ña janí da in da ndácaan vecaa. Ndá da cúni ñayivi janí da, da cán cúu da jání da.

7 Ta ndaja coo mé já ndácaan in da naní Barrabás vecaa xihín java ga da naxica xihin dá. Ndácaan da vecaa sahá ña nasahní da ndji tá nandivaa ñayivi.

8 Chí naxinu ñayivi nu Pilato já nacasáhá na cáhan na xihin dá ña ná caja da tá quiahva sá caja da.

9 Joo nandaca tuhún Pilato na já cáchí da já:

—Á co cúni ndó ña ná janí i da cúu rey nuú ñayivi Israel yóho —nacachi da.

10 Nacachi Pilato ña yóho jáchi xini da ña nandiquiahva na sacuahá nuú jutú cán Jesús nu da sahá ña cáhivi ini na xihin á.

11 Joo na sacuahá nuú jutú cán nacasáhá na jándinihi na ñayivi ña ná cachi na xihin Pilato ña ná janí da Barrabás.

12 Tá nandihi já nandaca tuhún Pilato na já nacachi da já xihin ná:

—Ndía cúni ndó caja i xihín da cáchí ndó cúu rey nu ndóhó, na Israel —nacachi da.

13 Anda já nanducú ñehe ñayivi cán tuhun nu Pilato já cáchí na já xihin dá:

—Cata caa ndó da ndica crúxu.

14 Já nacachi Pilato já xihin ná:

—Ndá cuachi nacaja da, vaha.

Joo ví ga ví cáyuhú cóhó na já cáchí na já:

—Cata caa ndó da ndica crúxu.

15 Ta sahá ña cúni Pilato candoo vaha da nuú ñayivi najaní da Barrabás. Ta tá nandihi najácaxáhan na Jesús já nandiquiahva da a ndáha na cahun cata caa ñahá na ndica crúxu.

16 Anda já ñéhe soldado Jesús cuahān nā yuyéhé vechúun cán. Já najánditaca soldado cán java ga táhan da.

17 Já nāchinúu na in jahmá cuáhá túun jata Jesús ta nachinúu na in tiyivi íñu jini á.

18 Tá nāndihi já nācasáhá nā cáyuhú nā já cáchí nā já:

—Cáhnū nahá ná cacuu yóhó, da cúu rey nuú nā Israel —cáchí nā sácu ndaa ñahá nā.

19 Tá nāndihi nācasáhá cáni na yiquí jini a xihín in ndoo ta nācasáhá nā xihnu ndaa na tójí nā nuú á já nācasáhá nā cáxítí nā nu á ña cája na tátuhun cája cáhnū na a.

20 Tá nāndihi nāsaacu ndaa na a já nātavá nā jáhma cuáhá túun ña nāsanúu jata. Ta najāndaca ndixi na a xihín jáhma mé á já nāsañehe na a cuahān nā cata caa na a ndica crúxu.

*Tá nācata caa na Jesús ndica crúxu
(Mt. 27:32-44; Lc. 23:26-43; Jn. 19:17-27)*

21 Tá ñéhe na Jesús cuahān nā cata caa na a ndica crúxu já nāndique táhan na xihín in da vaxi da ndihvi da ñuu Jerusalén. Mé da cán naní da Simón, da ñuu Cirene, da cúu tátá Alejandro xihín Rufo. Já nācāja ndúsa ná xihín dá ña ná ndicojo da crúxu nuú cata caa na Jesús.

22 Já nāsañehe na Jesús nāsaħan nā in xiqui naní Gólgota. Tuhun yóho cuni cáchí a: nu ndúu lásá yiquí jini ndji.

23 Cán nāsaħan nā vino nu Jesús, dó nācava táhan xihín jusa ña naní mirra. Joo coó nāxēen toho a coho a do.

24 Anda já nacata caa na a ndica crúxu. Já nacasáhá soldado cán sájíquí da saha jáhma Jesús ta nacachi xihin táhan da ña ndá da ná quee vaha cuu quehe in in jáhma Jesús.

25 Ta cúu á tátuhun caa in naha tá nacata caa na Jesús ndica crúxu cán.

26 Ta jini ndica crúxu cán nacahyí na ndá sahá nacata caa na a ta já cáhí a já: “Da yóho cúu rey nuú na Israel.”

27 Ta sa mé já nacata caa na ivi taa cuihná xihin Jesús: in da xoo cuáha ta in da xoo íti.

28 Ta xihin ña yóho naxinu coo tuhun Ndióxi tá cáhí a já: “Tañu taa quini nasacu na a.”

29 Chí cáva jini mé ñayivi yáha cán cánahá na xihin á já cáhí na já:

—Candehé. Yóhó cáhún ña jánditanun veñuhu cáhnu cán ta tixi uñi víxí quivi cáhún jácandichi tucún ña.

30 Jácacu mún. Cuáhán nuu ndica crúxu jan — nacachi na sácu ndaa ichi na.

31 Ta quiahva já cája na sacuahá nuú jutu cán xihin na jánahá ley Moisés sácu ndaa ñahá na. Ta nacasáhá cáhan xihin táhan na já cáhí na já:

—Nacuu nacaja Jesús jácacu da java ga ñayivi joo viti a cuú jácacu da mé dá.

32 Tá ta mé a ndaa cúu dá Cristo, da cúu rey nuú na Israel ná nuu da ndica crúxu viti ñúhú já ná candúsa nde da —cáhí na.

Ta janda da ivi táhan ndácaa ndica crúxu jin á cán cánahá da xihin á.

Tá naxihi Jesús

(Mt. 27:45-56; Lc. 23:44-49; Jn. 19:28-30)

³³ Tá naxinu coo caxivi ndaa nacanaá níí cúú ñuyívi ta janda caa uní sahini já nacasáhá nandiyehé tucu.

³⁴ Ta sa mé hora já nacayuhú cóhó Jesús já cáchí a já:

—Eloi, Eloi, lama sabactani —nacachi a.
Tuhun yóho cúni cáchí a: Ndióxi mí i, Ndióxi mí i, ndávaaha najándacoo ndáha ndó yehe.

³⁵ Ta java na ndíta cán naxini johó na tuhun cáchí a. Já nacachi na já:

—Cuni johó ndó jáchi cána da profeta Elías —nacachi na.

³⁶ Anda já xínu in da nasahan da nachindaxi da in ticoto ini vino iyá. Já nacató da mé ticoto cán nuú in yitó ndoo já nachitivi da do yati yúhu Jesús ña ná coho a do. Já nacachi da já xihín java da cán:

—Cóho candehó á quixi Elías jánuu a da ndica crúxu —nacachi da.

³⁷ Anda já nacayuhú cóhó Jesús já naxihí a.

³⁸ Anda já nandata java ndaa jáhma ndeé ña sáji nuu nuú yí ndivaha veñuhu cáhnu ñuu Jerusalén cán. Janda jini á ta janda sahá nandata.

³⁹ Ta ndaja coo in dataa, da sáhdá chuun nuú soldado cuéntá Roma nasahiin da nu ndácaa Jesús cán ta tá naxini da naxihí a já nacachi da já:

—Mé a ndaa táhyí cúú da yóho in túhún jini já jahyi Ndióxi —nacachi da.

⁴⁰ Ta nasandu java najihí ta sándeheé xicá na Jesús. Tañu na yóho nasandacaan ña naní María, ña ñuu Magdala xihín María, ña cúú naná Jacobo, da loho chá nuú José xihín in ña naní Salomé.

⁴¹ Nasandico najihí yóho jata Jesús ta nachindeé ñahá na tá nasahiin a estado Galilea. Cuahá ga

najihí nasanduu cán ta java na cúu ná nā nasahan xihín á ñuu Jerusalén jihna tá cámaní quivi a.

Tá najánduxu na Jesús

(Mt. 27:57-61; Lc. 23:50-56; Jn. 19:38-42)

⁴² Tá nācuaá tóo uun quiví viernexe tá cámaní casaa quiví ndíquehe ndéē nā Israel já nayaha tóco ndihi ña yóho.

⁴³ Ta ndaja coo ín in da naní José, da ñuu Arimatea, da cúu táhan nā cómí cuéntá sahá nā Israel. Mé José yóho ndáti da casaa quiví cacomí Ndióxi cuéntá sahá ñayivi ñuyiví yóho. Ta nasahan ndéé ini da cuhun da cahan máni dá xihín Pilato sahá yiquí cuñu Jesús ña ná quiahva mé Pilato ña nu dá.

⁴⁴ Chí nācatóntó Pilato tá nācandaa ini da ña sa naxihí Jesús. Já nācana da da sáhdá chuun nuú soldado da já nādacā tuhún ñahá da á sa naxihí Jesús.

⁴⁵ Tá nācaxi tuhun da cán nu Pilato ña sa naxihí Jesús já nasahan Pilato ñamaní nuú José ña ná ndiquehe da yiquí cuñu Jesús.

⁴⁶ Anda já nāxéen José in jahmá vaha ta najánuu da yiquí cuñu Jesús ndica crúxu já nāchitiví da ña xihín mé jahmá vaha cán. Tá nāndihi já nāchicaan da mé yiquí cuñu Jesús cán ini in yávi ndācaan ndica cáva. Tá nāndihi já nāchijahvi da yuhú cáva cán xihín in yuu jáhdá cáhnu.

⁴⁷ Ta ndaja coo María, ña ñuu Magdala xihín María, náná José nasandehé nā nuú nasacu na yiquí cuñu Jesús ini mé cáva cán.

16

Tá nanditacu tucu Jesús

(Mt. 28:1-10; Lc. 24:1-12; Jn. 20:1-10)

¹ Ta tá sa nayaha quivi ndíquehe ndée na já nasahan María, ñá ñuu Magdala xihin María, ñá cúu náná Jacobo xihin Salomé viti naquee na cuahan na cueen na java nuú ñaha támi sáhan ña chindáa na yiquí cuñu Jesús.

² Ta naha chá mé quivi domingo tá naqueta candii já cuahan na nuú nachicaan na yiquí cuñu Jesús cán.

³ Ta nani xíca na cuahan na íchi cán já ndítuhún xihin táhan na ndá quiahva caja na tavá na yuu ndájí nuú ndácaan yiquí cuñu Jesús cán. Já cáchí na já:

—Yo tavá toho yuu ndájí nuu nuú quihví ini nu ndácaan yiquí cuñu Jesús —cáchí xihin táhan na cásahan na jáchi cáhnu ndivaha mé yuu cán.

⁴ Joo tá naxinu na mé cáva cán já naxini na ña coó ga yuu ndájí yuhú cáva cán.

⁵ Ta tá nandihvi na mé cáva cán já naxini na cáa íin in dataa ndíxí jahmá yaa ña cáni. Íin coo da xoo cuáha ta cúu dá da yúta. Tá naxini najihí yóho da cán chí nayihví na.

⁶ Anda já nacahan da cán já cáchí da já:

—A yíhví toho ndó. Xíni yehe ña ndínducú ndo Jesús ña Nazaret, ña nacata caa na ndica cruxu. Candehé ndo nuú nasacu na a. Coó ga íin viti jáchi nanditacu tucu a.

⁷ Ta viti cuáhán ndo caxi tuhun ndó xihin na naxica tuun xihin á ta xihin Pedro ña cánuú mé á cuahan estado Galilea. Tá cuhun ndó cán já cuni

ndó a tá quiahva ñacachi mé á xih̄in ndo – ñacachi táto Ndióxi.

⁸ Já ñaquee na cán xínu na cuahan na jáchi ñayihví ndivaha na anda quiji ninu na. Coó ñacahan na xih̄in ni in ñayivi jáchi ñayihví ndivaha na.

*Tá ñaxini María, ñá ñuu Magdala Jesús
(Jn. 20:11-18)*

⁹ Tá ñandih̄i ñanditacu tucu Jesús ta tá ñat̄ivi mé quīvi domingo já ñá nū cuítí ñaxini Jesús ñasacuu ñá María, ñá ñuu Magdala, mé ñá ñatavá Jesús usa rí quini ñasandacaan ini ñá.

¹⁰ Ta tá ñaxini ñá mé á já ñaquee ñá cuahan ñá caxi tuhun ñá nuú na ñaxica tuun xih̄in Jesús ñá tácu a. Ta ndúu cuéha ini na ta sácu na ndúu na tá ñasa ñá.

¹¹ Ta ñacaxi tuhun ñá nu ná ñá ñanditacu tucu Jesús ta ñaxini ñá mé á joo coó ñaxeen na candúsa na ñá.

*Tá ñaxini ivi da ñaxica tuun xih̄in Jesús mé á
(Lc. 24:13-35)*

¹² Ta tá ñandih̄i já ñandijama Jesús ndá quiahva cáa já ñandaca náha á nuú ivi táhan na cuahan yúcu, na ñaxica tuun xih̄in á.

¹³ Joo tá ñandicuni na mé á já ñaquee na cuahan na caxi tuhun na xih̄in na java cán joo coó ñaxeen na candúsa na tuhun ñacahan ndíví na yóho xih̄in ná.

*Sáhdá Jesús chuun nuú na xica tuun xih̄in á
(Mt. 28:16-20; Lc. 24:36-49; Jn. 20:19-23)*

¹⁴ Tá ñandih̄i cán ñandaca náha Jesús nuú ndíhuxu in na ñaxica tuun xih̄in á nani ndúu na

xíxi na. Já naçasáhá jánani a na jáchi nandaja táhyí na ínima ná ta coó naxeen na candúsa na ña naxini na java cán Jesús tá nandihí nanditacu tucu a.

¹⁵ Já naçasáhá cáchi Jesús já xihín ná:

—Cuáhán ndo ní cúú ñuyívi yóho ta caxi tuhun ndó xihín ndihí ñayivi tuhun vaha sahá i.

¹⁶ Ta ndá na ná candúsa yehe ta candúta ná já queá cacu ndaa ínima ná ta a cühun na indayá. Joo na co candúsa yehe, na cán cúú na cühun na ndoho ini na indayá anda ama cáa quívi.

¹⁷ Joo na cándeé ini yehe caxi na ña xitúhún. Ta xihín quívi yehe tavá na ínima quini ndacaan ini ñayivi. Ta ndacaahan na tuhun saá ña coó nacatiahva na.

¹⁸ Ta tá ná tiin ndáha ná coo ta tá ná coho na ña cúú cahní ñahá, a cahní toho a na. Ta tá ná chinúu na ndáha ná jiní na quíhvi já ndivaha mé na quíhvi cán —nacachi Jesús.

Tá nandaa Jesús cuahan indivi

(Lc. 24:50-53)

¹⁹ Tá nandihí nacahan Jesús, xitoho í tóco ndihí tuhun yóho xihín ná anda já nandindita cuahan indivi ta nasacoo a xoo cuáha Ndióxi, tátá yo.

²⁰ Tá nandihí já naquee na naxica tuun xihín á cán cuahan na caxi tuhun na tuhun vaha saha Jesús ndijáá ñuu. Ta já nachindeé Jesús, xitoho í na cán ta náha ña cúú á ña ndaa cahan na jáchi nacaja mé á ña cúú cája na cuahá nuú ña xitúhún. Já ná coo.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

7f2d3ecf-6d15-55a5-9081-6e970474df2f